

世宗莊憲大王實錄

第六十五之七

0163679
no. 7



163679

藏 5.12.15

國立臺灣大學圖書館典藏
由國家圖書館數位化

世宗憲太王實錄卷第六十五

秋七月丙子朔召大司憲盧閑等教曰母嫌高得宗之言往就乃職閑
 等啓曰得宗生長濟州凡有利害無不周知往者 上因張友良移築
 牧場之策問於得宗得宗不願國馬之蕃息徒懷利已誣罔以啓更築
 牧場以致國馬之多損本府反覆推劾得宗雖極辨明然卒不能逃其
 罪責 殿下特從寬典只罷其職息至滬也得宗不念自己之非以至
 上言歸咎本府思欲全免殊無朝士之意臣等願更下攸司明正其罪
 上曰得宗坐此罷職又何加焉○都鎮撫申商等啓曰臣等聞中國日
 用雞豚羊牛以供御膳本朝土產鮮少進膳之物既已薄矣 殿下既
 禁軍士打圍又停不時之進御膳過薄今當軍額倍舊外牌番上時方
 入秋氣候漸涼軍士閑暇扭於怠弛願令當番軍士輪次捕獸則非惟
 供其御膳抑亦鍊習之一端也如是則軍士打圍一月一度不至於疲
 勞 上曰待八月為之商等更請 上曰然則當自是月之望始行○
 命饋資治通鑑訓義撰集官自是每十五日一次設之○是日始用新
 漏 上以舊漏未臻精密命改鑄漏器播水龍壺四大小有差受水龍
 壺二逆水時更用之長十一尺二寸圓經一尺八寸筭二長十尺二寸

面分十二時每時八刻并初正餘分爲百刻刻作十二分夜箭甚二十
有一徒煩適用更據檢時曆晝夜分升降率約二氣當一箭九十二箭
與簡儀參考不失毫釐 上又慮報時者未免差謬命護軍蔣英實制
司辰木人隨時自報不做人力其制先建閣三楹東楹之間設座二層
上層立三神一司時鳴鐘一司更鳴鼓一司點鳴鈺中層之下設平輪
循輪列十二神各以鐵條爲幹而能上下各執時牌更迭報時其機運
之術中楹之間置樓上列播水壺下置受水壺壺上植方木中空面虛
長十一尺四寸廣六寸厚八分深四寸空中有隔去面入一寸許左設
銅板長准箭廣二寸板面穿十二竅以受銅小丸大如彈丸九竅皆有
機令可開閉主十二時右設銅板長准箭廣二寸五分板面穿二十五
竅亦受銅小丸如左板准十二箭凡十二板隨節氣施用主更點受水
壺浮箭箭首擎橫鐵如筋長四寸五分壺前有陷陷中斜置廣板首接
方空木底尾達東楹座下設隔四如甬道狀隔上安大鐵丸大如鷄卵
左十二主時中五主更及每更初點右二十主點其安丸處皆有丸開
閉且設橫機其機狀類匙一端曲可以拘環一端圓可以受丸中腰皆
有圓軸令低昂其圓端當銅筒之竅銅筒有二斜設於隔上左長四尺

五寸圓經一寸五分主時下面穿十二竅右長八尺圓經如左筒主更點下面穿二十五竅竅皆有機初令竅盡開銅板之小丸墜注動機則機自捲竅以爲次丸轉過之路次次皆然東楹座上層之下左懸短筒二一受丸一內設機匙匙之圓端半出當受丸筒底右立圓柱方柱各二圓柱中空內設機形亦如匙半出半入左柱則五右柱則十方柱斜貫小筒每柱各四一端爲蓮葉一端爲龍口蓮葉則受丸龍口則吐丸龍口蓮葉上下相當其上別有懸短筒二一受更丸一受點丸右方柱每蓮葉下各附直短筒二橫短筒一其橫筒一端接於左方柱蓮葉下左圓柱之五匙右圓柱之五匙其圓端各當龍口蓮葉間右圓柱之五匙其圓端半入直筒之內漏水下注於受水壺則浮箭漸升應時撥左銅板竅機而小丸墜下轉入銅筒從竅墜撥其機機開而大丸墜轉入座下懸短筒墜動機匙則機一端自筒內上觸司時神之肘即鳴鍾更點亦然但更丸則注入懸短筒墜撥機匙自左圓柱中上觸司更神之肘鳴鼓轉入點筒復裝初點之機自右柱中上觸司點神鳴鈺而止于蓮葉下直小筒其轉入處設機初閉更丸之路及其轉入則所入之路閉而更路開餘更皆然待五更終抽扁出之每更二點以下之丸則墜

注懸短筒轉入蓮葉撥其點之機而止次點之丸轉過亦撥其點之機而止其止丸之筒有竅加扁閉之及五點之丸墜動其最下之機則連機鐵繩以次抽諸扁與前三點之丸一時俱下矣其主時大丸墜注懸短筒轉入干附圓柱筒墜踏橫木北端木長六尺六寸廣一寸五分厚一寸七分當橫木中腰主短柱狹橫木接以圓軸今可低昂於橫木南端立圓木如指長二尺二寸當報時神之足下足端有小輪軸大丸抽壓北端則南端仰而擊神之足升座中層之上橫木北端之北立小板今可開闔板有鐵繩上連主時懸筒之機匙動則板開今出前丸橫木南端伍而報時神還於輪而次時神即代升其輪轉之制輪外橫置小板長尺許坎其中四五寸許令銅板橫跨其上其勢順傾一端設軸今可開閉報時之足初入銅板下半寸許升則開銅板而上上則還閉及其時盡而還輪面則足端鐵輪順轉銅板而下斲不能住次時神亦然凡諸機皆藏隱不現而所見者具冠帶木人而已此其大率也命金鑰為銘并序曰帝王之政莫重於協時正日而考驗之則在於儀象畧漏蓋非儀象無以察天地之運非畧漏無以准晝夜之限千歲之致始於一刻之不差庶績之熙由於寸陰之無曠是故歷代聖神順天出

治莫不致謹於斯恭惟我 主上殿下存高堯之欽若體大舜之在璣
爰命攸司制作儀象以憑側候仍新漏器以齊晷刻延於禁內西偏建
閣三楹命護軍臣蔣英實作司辰木人三神十二神以代雞人之職東
楹之間設座二層三辰在上層一前置鍾撞之以報時一前置鼓擊之
以報更一前置盃扣之以報點其十二神各執辰牌繞立平輪隱於中
層之下隨時迭升中楹之中置壺設機用鐵丸以撥其機每於時至諸
神輒應終究儀象幽天不差真若有鬼神守之者見者莫不駭嘆實吾
東方前古所未有之盛制也遂名其閣曰報漏爰命臣鑰昭示將來臣
拜獻銘銘曰陰陽代序晝夜交錯天道默幹神功無迹財成輔相晷漏
斯作創自黃帝歷代殊法惟我東土舊制踈闊肇造景式我 后濬摛
先在璣衡且新漏器播水壺四受水壺二晝夜消息由刻差始乃立之
籌二六以示聚攆擊刀或差候向刻木爲神不勞守吏安神司漏崇閣
乃成設上下座在彼東楹上有三神分鍾鼓鉦代雞人呼有秩厥擊下
十二神辰牌是持繞平輪面迭升報時究其機激中楹是徵隔以層樓
置壺相承銅作板二鑿覈擬箭加機受丸樹于壺面箭陞動機丸墜而
轉丸落斜橫抵神下也兩歧分四若甬道者連筒左右受丸之注筒有

機竅視銅板數別有大丸筒邊布列迤發其機如電之疾機之所觸司
 辰效職有如鬼神見者嘆息偉茲宏規順天作則制侔造化範圍不忒
 念茲寸陰用熙庶績折柳其藩民自不惑爰立準程昭示無極報漏閣
 置新漏使書雲觀生更送入直監之慶會樓南門月華門勤政門各置
 金鼓光化門建大鍾鼓當夜各門掌金鼓者聞木人金鼓之聲以次傳
 擊迎秋門亦建大鼓午時聞木人鼓聲亦擊之掌光化門鼓者又傳擊
 之慶會樓南門迎秋門光化門書雲觀生掌之餘門各其門直宿甲士
 掌之英實東萊縣官奴也性精巧常掌闕內工匠之事○丁丑召知中
 樞院事李蕝議曰 太宗肇造鑄字所鑄大字時廷臣皆曰難成 太
 宗強令鑄之以印群書廣布中外不亦難歟但因草創製造未精每當
 印書必先以蠟布於板底而後植字於其上然蠟性本柔植字未固纔
 印數紙字有遷動多致偏倚隨即均正印者病之予念此弊曾命卿改
 造卿亦以為難予強之卿乃運智造板鑄字並皆平正牢固不待用蠟
 印出雖多字不偏倚予甚嘉之今者大君等請改鑄大字印書以觀予
 念近因北征頓失兵器銅鐵所用亦多矧今工匠分役各處務甚繁夥
 賦比亦不可不為也乃命蕝監其事集賢殿直提學金墩直殿金鎮護

軍蔣英實僉知司譯院事李世衡舍人鄭陟注簿李統之等掌之出經筵所藏孝順事實爲善陰隲論語等書爲字本其所不足命晉陽大君璩書之鑄至二十有餘萬字一日所印可至四十餘紙字體之明正功課之易就比舊爲倍○禮曹啓 永寧殿 宗廟秋享大祭犧牲當熟時無永恐其有臭今後 永寧殿 宗廟每一室各進冰一丁七月朔望祭亦依此例施行永爲恒式從之○義禁府啓朴葵前所謂邊氏口不可道之言者與邊頤僞造文券事也然僞造文券非口不可道之事葵猶不言其情請科罪命付處外方○京畿仁川郡海潮溢前所未至處或九百餘尺或六七百尺沉損禾穀○兵曹啓今試唐焰焞煮取之法所出倍於鄉焰焞今後以唐焰焞例煮取今秋送焰焞匠于平安咸吉江原黃海等道煮取之法俾令教習從之○戊寅親傳秋享香祝○時傳聞 帝遣使勿刺溫野人推刷虜去本國人口交付本國推本國征討婆猪江所獲未還人口財產給付婆猪江野人召議政府及六曹判書議之其一曰定州人李如右赴征時潛持野人紅段子六幅廣木綿二十八尺小木絲四尺而來及今發覺還送乎否僉曰義當還送然彼如曰如此小物尚且送來安有藏匿之物則可矣彼如曰我土財產既以無

遣送還奏達今觀如此送來則安知本土之物尚漏未還乎以此復請
朝廷以致更刷則不如不送之爲愈也從之其二曰使臣出來路問未還
野人牛馬財產則何以答之僉曰當答以年前本朝欽奉勅諭婆猪
江人口財產即令推刷一一差人送回其原係本國軍丁給親完聚已
曾奏達厥後毛憐衛土官都督僉事撒萬答失里連連遣人懇請未還
人口財產本朝再三差官抄探窮僻瘦損馬匹外絕無脫漏之物曾以
本國軍丁奏達完聚者尚惜父子夫婦相離之情並令還送以此答之
何如從之遂傳旨平安道監司都節制使○水原男丁一人震死○兵
曹啓烙山字印乃官馬也賞賜及換易之馬仍存山字之印混雜難辨
別造周字火印臣民所有山字馬匹外方則令今秋等點馬別監各於
界首官都會殺印不遣點馬別監江原道則令其道首領官殺印京中
則令司僕寺殺印來乙卯年正月初一日以後不殺印馬匹委本寺考
察犯令者依會降教旨馬匹屬公從之○平安道祥原郡山崩男女共
三十名僧二名雁死○兵曹啓三軍鎮撫等事務繁劇考講甲士別侍
內禁衛成衆愛馬等陳說置簿暫無間隙上項軍士等入番時陳設習
讀馬兒排設則令人直鎮撫檢察春秋兩等陳說考講則武學提調訓

鍊觀提調一同考講通略通置簿報本曹從之○己卯黃海道瑞興黃州遂安山崩男女共二十三人壓死○咸吉道都巡撫使啟孔州古石城頽落處今春因民力不足以木補之然不可若是其踈虞量抄吉州鏡城軍人以石改築其慶源寧北兩處賊路要害人民聚居木柵則以兩府人民造築且甲山無路口子最是要害之處歲在癸丑己設木柵然不築邑城誠爲未便今秋抄其官軍人築之近來本道使客煩多不無勞苦上項築城之事令監司定首領官及差使負監築從之○庚辰御經筵○刑曹啟私奴七才詐稱大殿別監檢點瑞興各戶還上受出之狀及飢民有無律該斬命減一等○辛巳御勤政殿受朝○視事上問兩澤均否左議政孟思誠啟曰今年之水北方多南方少上曰予亦聞忠清全羅道兩澤不浹然不至於祈雨也水田則可矣蕎麥與菽之耕不可失時也都承旨安崇善啟曰因其陰雨田甚沮澁不能耕種上曰今年京畿兩澤適中田之沮澁如非過雨所致特因以陰耳其在五月尚有過旱之慮今年之雨不可謂之過也仍問年穀稔否崇善啟曰雨暘時若年豈不稔乎○鐵原府使權曙知杆城郡事安保海安峽縣監康子敬等辭引見曰各就乃任慎刑愛民體予至懷○御經筵

○黃海道監司啓長淵信川海州等官山崩男女共十人壓死○禮曹啓喪祭禮未盡條件一繼母與所生之母不異大明律及元六典皆斬衰三年且卿士之祭禮二妻以上并祔則旣以繼母祔廟而不服其喪不可也依禮制服喪三年但文公家禮母服齊衰三年故今服所生母者皆服齊衰依家禮亦服齊衰父在者亦許期年而心喪三年其有不得已起復者亦行心喪其孫之服與親祖母同繼母繼祖母服子孫喪亦與所生子孫同一二妻以上並祔則均是母也其子孫非親母忌則不告暇不可也其告諸母之忌一依親母一所生母或見絕於父或再嫁則義不得祔廟別祭於私室依六典服期年而心喪三年從之○兵曹啓令修平安道各官及營鎮所在古軍器從之○壬午御經筵○司憲府啓李希信守息津酷愛林川娼妓李秋與嫡混處公衙妻妾失序律該杖九十改正季秋與嫡相詰致傷以妾歐妻律該杖六十徒一年從之○司憲府狀啓檜巖寺慶讚往會各人罪故叅議宋興妻鄭氏叅議金尚直妻李氏故護軍宋勉妻申氏等婦女尼僧共二十餘各杖八十皆以失節論講主慧熙杖七十作無辜戲覺圓信珠信賢各答五十李大種朴東菱各杖八十賤人婦女各答五十分首從或答四十三十

奉教依允慧熙收贖勿令還谷士族婦女尼僧並皆收贖勿收爵牒功
臣之妻之女之婦並皆勿論朴東美曾犯罪收職牒當杖并贖之○修
城禁火都監請加開川之軍從之因前一千五百加一千五百皆用江原
黃海等道船軍赴防京畿者○賜祭于卒谷山府院君延嗣宗其教書曰
協贊鴻基寔賴忠義之臣緬思膚功當篤哀榮之數惟卿性資貞亮器宇
沈雄爰自弱冠而有成遂從 太祖于潛邸夙夜無怠鎮撫親軍及
太宗在九二之時有姦臣構兇逆之謀社稷安危在於呼吸卿致身於
倉卒之際定亂於頃刻之間翊戴之勞佐命之績載在盟府永世難忘
復能辭將相之高官著老萊之彩服歸養老母克盡孝誠攸司上聞表
厥閭里蓋卿立身行己之大節指此二節可謂無媿於古人矣以四朝
之舊臣爲一時之耆蔡謂享百歲期輔寡躬胡纔及於七旬遽永隔於
一日茲陳一爵用慰貞魂於戮元首股肱旣休戚之與共山何帶礪何
存沒之有殊○癸未判黃州牧事崔蠲爲繼母病辭職不待報而行監
司啓擅離之罪命勿論令禮曹立法禮曹啓繼母與親母同京外從仕
者其於疾病許令辭職侍藥從之○御經筵講名臣言行錄至溫公論
孟子曰蓋溫公粹美孟子巖巖氣類不合故溫公不推尊孟子焉經筵

官鄭昌孫啓曰温公欲去孟子書於四書中矣○甲申戶曹啓今觀採銅之事遂安郡則產出不多力役多重已曾減除昌原府則丙午丁未兩年各一百斤長洲縣庚戌年五十斤其數如此之多而欲規避故不用意採取今更差人試驗從之○丙戌御經筵○都鎮撫柳殷之等啓曰臣等所進吹角序立圖 上謂無後軍也令臣等更修臣等竊謂天子六軍大國三軍今若加後軍則是乃四軍而不合於古制且三軍之外別無軍士若抄三軍以爲後軍意謂不可 上曰後門把截如之何殷之等啓曰左右軍可以回抱聯綴矣 上曰卿等之言是矣○倭人藤原賴久使人來進土宜○倭人進上物件或有品惡禮曹却而勿進上曰客人所進之物以其品惡却而不納誠爲不可今後勿論物品善惡皆進之隨其物品高下定其回奉多寡無乃可乎都承旨安崇善啓曰 上教允當 上曰倭野人進上土宜禮曹郎廳進客館與客人同坐今匠人看品知重分善惡而退之似乎計價爭利有違待遠人之意自今客人詣闕進上禮曹郎廳進承政院令匠人省品分善惡以啓使主掌官隨其物品回賜○全州府尹洪汝方以病免○黃海道海州人二名震死兵曹啓時波赤苦務倍重非他軍士之例也其初受職者

勿除隊副授以副司正其餘適兒依宣德八年受教每一番以到者
每於各品例遷一人并考騎步射畫數鷹子到或仍品或差行職從
之○丁亥大興縣監任重辭引見曰忠清道近值凶歉予甚軫慮惠恤
民生俾不阻飢慎刑罰勸農桑以厚民生○黃海道黃州等九官水災
尤甚禾穀累日澆沒不實○平山民夫妻震死○戊子視事上曰今
年畿甸之間暹雨雖久然無大水害稼忠清全羅慶尚三道則時無水
災之報北方之事深可憂也今年霖雨大甚禾稼損傷予甚慮焉右議
政崔閔德啓曰臣亦聞之北方雨水頗多大抵北方水田少而山田多
因其水甚立苗甚踈然其茂盛與否時未聞也上曰咸吉道水損之
田已報千餘結矣其損者已矣其未損者亦未知其終也閔德啓曰禾
穀或因風損或因水損秀而不實者多矣不可預期其豐稔也姑待八
月二十日後乃知其實也閔德又啓曰今國家昇平日久當及閑暇之
時願築城郭以固邦基禽獸猶有巢穴以禦外侮而况人乎自古國家
治亂無常安知後世不能如今日之盛治乎至于後世聖君不作又無
賢臣則其能久乎邊城之築爲萬世長久之計不可緩也上曰予知
卿意焉時上頗留意甲兵城郭之事忠清全羅慶尚三道城郭以刑

曹判書鄭欽之掌之咸吉道城郭戶曹參判沈道源掌之平安道城郭戶曹參判朴坤掌之○忠清道監司南智慶尚道監司金孝貞等辭引見曰卿等已知予意往盡乃職○以趙注爲右獻納裴閑右正言○差司譯院注簿張俊管押被擄唐人梅嚴甫等九名解送遼東○傳旨咸吉道監司曾下教慶源寧北府入居人民當初輕緝薄賦以厚其生且元典各道海邊開荒田稅初年全免二年半收三年以後全收今戶曹啓欲收兩官人民今年田租之半議諸大臣僉曰元典所載新墾田收租之法所以勸民開墾也非爲有如新設慶源寧北府而立法也權從備儲之宜依戶曹之請差減收租以補涓埃之畜予亦以爲慶源寧北野人初面糧餉緊要之處而全不收租則無知之民將其所收不願將來並皆糜費公私俱竭甚可慮也若至凶荒則全免其稅農事豐稔則收其半稅雖不豐稔不至凶荒則收其三分之一以時斂散人民新徙之初恐有衣服難備之患今送唐綿布二千匹視其豐歉從民間時直隨直分給換其米穀納于國庫啓其所納之數收租則觀其今年農事差減收租之數熟思以啓○已丑親傳望祭香祝○平安道寧邊府暴兩山崩男女共五名壓死○兵曹啓時波赤迎兒職曾已詳定獨不限

去官之品未便請限五品其中年少有才者雖去官之後從自願考其勤慢互差行職年滿六十則放送從之○庚寅永同縣監郭珣信川縣監朴基命辭引見謂郭珣曰其道近失農業民生不裕常加存恤慎刑勸農謂基命曰聞其道多水災愛民慎刑俾無飢餓○辛卯御勤政殿受朝○上曰今鑄大字爲寶重矣予欲印資治通鑑頒諸中外使老人易於觀覽若備紙三十萬卷則可印五六百件矣其紙墨備辦之策承政院布置○行四門祈晴祭三日蓋霖雨太甚損傷禾穀也○右議政崔閔德進陳鷹一連人謂以論道之臣進翫好之物其可謂知大體乎○壬辰陰城縣監全孝崇辭引見曰愛民慎刑○命造印資治通鑑紙五萬卷子造紙所十萬五千卷子慶尚道七萬八千卷子全羅道三萬三千五百卷子忠清道三萬三千五百卷子江原道共三十萬卷仍傳旨楮以國庫米換易役境內僧人給與衣糧如蒿節蕪麥節竹皮麻骨等物因其易備每五分交楮一分造之非惟紙力稍強合於印冊用楮亦不多矣○癸巳視事○知安山郡事李護辭引見曰京畿凶歉民生可慮徃撫斯民慎刑勤農○命放諸道當番侍衛牌以前年凶歉裹糧不敷也○禮曹啓釋奠祭東西廡獻爵始於殿內終獻之時故東廡

五十三位西廡五十五位各一獻官奠爵後各行再拜行禮太遲請加東西廡分獻官各一員從之○慣習都監啓御前禮宴鄉樂在東第一行瑟琴唐琵琶玄琴鄉琵琶伽椰琴各一第二行同第三行大琴四鄉感琵琶一第四行杖鼓四右鄉樂內在前唐琵琶一瑟琴一今各加一唐樂在西第一行唐琵琶六方響二第二行大箏二牙箏二第三行簫篋六笙和各一第四行龍管二唐笛四洞簫二第五行杖鼓八第六行教坊鼓一右唐樂內在前牙箏大箏各一今各加一命下禮曹○刑曹啓各司京役奴婢給奉足於外方奉足之物不時上送有名無實各其司將奉足奴婢小名接處每年預報本曹行移所居官守今於秋成催督收納給狀送之其不備納者充定選上使之立役從之○黃海道冤津縣男一人震死○甲午平安道嘉山等七官蝗虫害穀因雨滅息○兵曹啓軍務國家重事故各道軍容差遣曹堂上官及都鎮撫點考已曾立法獨無京城軍器點考之法紫門軍器監軍器及本監軍器每一年一度曹堂上及都鎮撫一同點考不用心修葺提調當該官吏須即啓聞依贖六典施行從之○黃海道水損田一千一百七十餘結平安道水損田六千八百餘結咸吉道水損田一千五百餘結江原道水損

田七百餘結○乙未賜祭于奉大提學鄭招其教書曰人臣盡忠之心不渝終始國家報功之典當備哀榮是乃恒相夫豈私惠惟卿性質聰敏器宇英豪夙懷經濟之才研窮聖賢之學見聞博洽足以決疑識度剛明可以斷疑屢居諫省而袞職裨補再振臺綱而邦憲肅清是以擢爲近臣又洛庶政出觀方面入議刑獄政所至而有聲才無施而不適允百制作皆倚裁成頃緣疾病之纏俾處優閑之任旣長文館又輔儲宮永擬股肱之良以資龜鑑之益何天奪之大遽使予心而盡傷今遣禮官往陳菲薄且令節惠以慰貞魂於戲休戚既同敢忘卿之舊績幽明無間諒體予之至懷○禮曹啓前此雅樂署祿官一以丁吏移屬新樂工歇差備人及舊樂工歇差備人一年相遞互相錄用然舊樂工之數少故不過十年或二十年再蒙受職速遷去官新樂工或至三十餘年四十餘年未蒙受職似乎不均今後勿論新舊並以仕日多者叙用從之○丙申視事 上曰去歲戊戌禾穀方秀歲將大有以秋霖太甚年不登稔今年北方則有水災郊畿之內時無大水禾稼稍盛然霖雨不止慮或沮如卒不登稔領議政黃喜等啓曰今年京畿雨水不及於前年下三道雨水非惟不過猶且不足○京畿黃海忠清道沿海郡縣

因海潮溢沉損禾稼三千三百二十餘結古老言今年潮水前此所無
○慶尚道寧海等三官有青黑虫害蒼麥因大雨皆死○丁酉判典義
寺事宋履辭職曰臣生於庚申越八年丁卯母歿戊辰父娶金氏爲妻
有養之勤至深至切又以其無後土田臧獲悉畀于臣恩愛之篤雖所
生之母無以加矣臣於辛亥冬受任南原金氏在金海癸丑正月捐世
臣聞計奔喪既歛既葬欲終其制是年六月授臣以司憲執義 聖恩
至重不遑他念且世俗爲繼母未有終三年之喪者不得已就命從事
深負金氏鞠養之恩常懷悒悒哀慕不已月十九日伏覩禮官受教移
文節該繼母與所生之母不異不服其喪不可也依禮制服喪三年臣
請至再三更感 聖朝仁孝之治金氏大喪在明年正月喪制尚未盡
矣伏望解臣本職俾終未盡之服若衰麻去之已久雖未可復以素衣
白笠得盡餘制則小臣報本之心猶愈於已矣從之○行北郊祈晴祭
○刑曹啓奴婢買賣者多而價錢之數不同其價錢依贖六典徵役價例
施行從之○戊戌 上曰時值百穀垂成久罹陰雨之災用是軫慮欲
赦徒罪以下何如且職牒見收者又欲還給然移文各道待其回報則
必至稽緩如之何則可都承旨安崇善啓曰昔 上憂旱特宥徒罪以

下以答天譴今又倣此赦宥幸甚且各道所收各品職牒盡輸于吏兵曹令兩曹相考以啓則即日事也何必彩文各道乎 上從之即下教旨于刑曹曰今當西成之時陰沴為災傷我稼穡民將阻飢靜思其由必有刑政失中冤抑莫伸自宣德九年七月二十三日以前徒罪以下已結正未結正並皆原免又令吏兵曹收職牒人罪名開寫以啓○禮曹啓今當孟秋霖雨過多損傷禾穀將來可慮令各道各官依前禱祭城門祈晴于境內山川 從之○已亥 上憂陰沴之災曰鑿池船軍何時上來予欲除之何如都承旨安崇善啓曰臣亦欲啓達矣今天災至於如此關內修葺外其餘不緊營繕一皆停罷鑿池雖所當為非及時事也京畿忠清道船軍勿令上來可也仍啓曰新舊別寔為小民設也今燔瓦多積民無貿易雖不加造猶可也其赴役僧人並皆放還何如且黃海道因水災凶歉侍衛牌勿令番上何如 上從之即傳旨兵曹黃海道因大雨凶歉民生可恤來八月朔當番侍衛牌勿令番上鑿池船軍勿令上來燔瓦僧人亦皆放還○傳旨工曹曰不得已修葺外不緊諸處營繕並皆停罷○傳旨戶曹京畿江原黃海等道禾穀損傷將失農業可以蠲除貢賦磨勘以啓○上曰下三道侍衛牌並除番上

何如安崇善啓曰 上之軫慮至矣盡矣然黃海道則既有虫灾又有大水禾穀覆沙京畿江原兩道則未見其終徒以連月下雨預料凶荒蠲減貢物似乎大早待秋成考其凶歉與否然後蠲減未爲晚也下三道時未失農待衛番上不宜並除 上皆從之○還給三百三十四人職牒○夜鵲鵲鳴于建春門弘禮門行解恠祭 上曰予欲盡捕鵲鵲何以捕之安崇善啓曰遣內禁衛使山直人指示鵲鵲在處捕提可矣從之○放還朴蔡金裯俞興俊車孝生廉恥李仁長李義山等○庚子咸吉道都事李孝之洪州牧使閔犀角任實縣監李允恭等辭引見命孝之曰其界營構事多徃同監司協力共圖命犀角等曰各就乃職愛民慎刑○吏曹啓醫術須究知陰陽五行生克消息之理者乃能診病投藥且古之良方多出儒醫之手則通理文人兼治醫術古有其例加設典醫兼正兼副正兼判官兼注簿各一並以博學文士除授惠民局濟生院則提舉別坐中一人兼丞一入以博學剛正勤謹文士差定從之○禮曹啓濟生院醫女等逐日仕官習讀醫書看病針灸勿論晴雨苦務倍重依女妓例一年兩度賜米從之○平安道新安館路察訪啓自新安館至林畔九十里自林畔至良策九十里自良策至義州

九十里相距遙隔而緊急乘駟者不絕故馬匹率皆困死雲興車輦所
申等三小館依大館例加定人馬則大館人馬庶幾歇息歲在戊申令
補充軍只立馬十二今依大館例人物馬匹分定各官令議政府兵曹
議之俞曰前此補充軍十名各加二十戶賞以隊長隊副之職後如有
祖父有職品者依限品例土官叙用何如 從之○上曰予欲箇滿各
司吏典令四十歲以上者許令去官何如承旨等啓曰臣等願不但各
司吏典成衆官年六十以上人並令去官暢情何如 從之○都承旨
安崇善等啓曰書雲觀前監候鄭習有孝行年幾六十其母爲倭賊所
殺載在烈女之列乞除職以旌其人何如 上曰何不曾啓崇善啓曰
意欲因閒以啓以矣 上曰須令除職以彰其節○辛丑茂長鎮僉節制
使金閏龍潭縣監宣三達辭引見曰今年水災太甚用是軫慮爾等往
欽拱體予至懷 召議政府六曹判書等議事曰歲在戊戌百穀垂成陰
雨爲災用是不稔今值西成久罹陰沴之災歲必將凶予甚軫慮今年
雖歉去歲豐稔則猶可免飢矣去今年候失農業民生可慮靜思其由
天變之至此必由人事之所感允寡人思慮所不及者待廷議以行黃
喜等議曰下三道獐鹿殆盡條脯片脯未易備納不得已分定鎮屬軍

官與各官督令捕獲弊及於民誠爲未便令主掌官磨勘減數准閏德等議曰諸島入放馬匹因病致死徵於牧子愁恨不淺自今勿令推徵且軍資監造成材木過乎長大民甚病之量減長大令民易於輸轉黃喜等又議曰京外官吏耗失雜物非入己者勿徵且癸丑年以上各官未納貢物並皆蠲免凶歉尤甚平安黃海道往年還上量減以恤民生關內及公處推徵雜物除耗失竊盜外有本色破毀物件勿令推徵又議曰京中民居稠密家基難得外方則人物鮮少土地有餘無識之徒率居危險之地每致山崩壓死其生可恤自今山崩可疑處所居民戶並令移居何如喜等曰危險之地居民宜使移居申商等曰仍舊何如又議曰書房色飯監等闕內各差備人俱受職品如或貶黜仍收職牒者宜今後使其中元有職者與蒙赦還受職牒者並今後使則有違於職品之意如不役使則年少之輩思欲身閑故犯小失以冀貶黜者恐或有之如之何則可喜等議諸色匠人雖有職品皆從本役書房色飯監等例此役使幸甚又議曰婆猪江野人凡察贈彩段于江界都節制使成達生達生固拒再三不獲已受之具辭以啓令大臣議之皆曰本土所產皮物外如此等物義不可私受然予以爲彼人等狎性獸心喜怒無

常不可以禮義待之權從厚待之意允所贈遺一皆受之何如申槩曰交
以禮接以道贈之厚意則斯可受矣安純等曰彼當贈遺陽爲忠厚之
言陰欲瓊琚之報茲一受之以厚其報則彼將繼踵而來無物不遺以
望其報溪壑之欲其能填乎自今皮羽外並皆勿受以杜後日之弊議
畢崔閔德啓曰年前西北之民勞於漕轉困於征討牛馬斃損今年又
因雨水全失農業其生可恤碧潼滿浦築城之事不可舉也修其木柵
一二年間猶可防患乞勿遣城基巡審使上皆從之傳旨戶曹癸丑
年以上各官未納貢物並今蠲免凶歉尤甚平安黃海兩道往年還上
量減其數下三道所納鹿脯亦量減數軍資監造成材木量減長大令
民易輸京外官吏耗失雜物除入已外勿徵山險傾危之地所居民戶
並今移居又傳旨兵曹諸島入放病死馬匹勿徵牧子傳旨刑曹關內
及公處推徵雜物有本色破毀物件姑今勿徵申商啓曰危險之地所
居民戶悉令移居以免壓死之禍上教允當然各官守令不顧大體
恐民有壓死罪及其身督令移居則反生巨弊姑停此令何如上從
之○都承旨安崇善啓曰今當霖雨爲災天變可懼且會降戒酒教書
大小之人縱酒無畏不謹天戒迎餞會飲痛行禁理從之即傳旨司憲

府○咸吉道安邊府有青黑兩色虫害蕎麥大雨三日皆死○上憂水
災命停秋等講武安崇善啓曰雖有水災今年豐歉時未必也講武諸
事亦非時方預備至于八月審知豐歉知會停罷未晚 上曰水潦方
深未可遣人知會姑待二三日更啓時繕工監正徐仁道率工匠三十
四名往清州聚船軍二百名所簡儀臺圭表石以水災亦停之○壬寅
成衆愛馬年六十以上中樞院錄事崔陟等十三除副司直各司吏
典簡滿年四十以上議政府典吏金復禮等五十五除司正敦寧府典吏
姜臨等六十七除副司正皆用下番甲士之職其餘五十六人都添錄
事行隊長並令去官○吏曹參議僕循過昌德宮門洞口不下馬司憲
府劾之 上命循就職令司憲府勿劾時循撰集通鑑訓義 上賞於
撰集特命就職循爲人性羸率不分辨稍能記誦書史選人集賢殿遷
至參議○上教都承旨安崇善曰前日因爾所啓還給徐達妹夫盧皓
職牒皓爲救妻兄之意可恕故也無乃有盧皓一搢受罪之人乎崇善
啓曰盧皓一樣人則無有但臣以謂徐達則罪魁難赦其他差使負李
守剛李韻尹煥郭圭趙恂等所犯今已八年再經大赦死罪之人尚蒙
恩宥守剛等之罪雖曰深矣恐不如死罪之言也命還職牒何如 上

曰守剛等聽大臣之請免達死罪移之於奴其可怒乎所言雖是予不赦也崇善再請 上曰予當思之○禮曹與詳定所撰進祈告 杜稷

儀注報祀同唯飲福為異前一日諸祈官清齋一宿於祈所若事非迫切散齋二

日致齋典祀官帥其屬掃除壇之内外設國社國稷神座各於壇上近

南北向后土氏神座於國社神座之左后稷氏神座於國稷神座之左

俱東向席皆以莞設獻官位於北門內當壇南向設執事者位於西門

內道北東向南向設監察位於北門內西北隅東向書吏陪其後謂者

贊者位於壇門外俱近西東向南向開瘞坎二於壇之北壬地方深取

足容物南出陞設望瘞位於瘞坎之南獻官在南北向大祝贊者在西

東向北上祈日丑前五刻丑前五刻即三更一刻典祀官帥其屬入奠祝

版其文若水旱疔疾蝗各一於神位之右各有陳幣篚各一於尊所設

香爐香合并燭於神位前次設祭器實饌具每位各左二邊栗黃在前鹿脯次之

右二豆菁藟在鹿脯次之前簋各二在蓮豆間簋在左簋在右簋實以稻栗梁行

黍稷在俎一在簋簋前豕腥以爵一在俎前有又設尊罍國社大尊二實一

明水一山罍二實玄酒皆加勺簋在壇下西北隅后土氏象尊二實一

明水一山罍二實玄酒於國社酒尊之西俱南向東上允尊罍實明

國稷后稷氏尊壘並如國社后土氏之儀設洗於壇門外之西北南向

盥洗在西壘在洗西加勺篚在洗東北肆實以巾又若盥洗之篚則設諸爵洗在東

執事盥洗於獻官洗西北南向典祀官退就次服其服社稷丞服其服

升設國社后土氏國稷后稷氏神位版於座前三刻獻官及諸執事各

服其服謁者贊者入自西門先就北門內拜位南向東上四拜訖就位

謁者引獻官以下俱就西門外位前一刻謁者引監察典祀官大祝祝

史齋郎社稷丞入就北門內拜位重行南向東上立定贊者曰四拜監

察以下皆四拜訖謁者引監察就位引諸執事詣盥洗位盥悅訖各就

位齋郎詣爵洗位洗爵拭爵訖置於篚奉詣尊所置於坫上謁者引獻

官入就位贊者曰四拜獻官四拜謁者進獻官之左白有司謹具請行

事退復位贊者曰再拜在位者皆再拜贊者曰行奠幣禮謁者引獻官

詣盥洗位南向立贊搢笏盥手悅手盥手不贊贊執笏引詣社壇升自北

陛詣國社神位前南向立贊跪搢笏執事者一人奉香合執事者一人

奉香爐謁者贊三上香執事者奠爐于神位前大祝以幣篚授獻官獻

官執幣以幣授大祝奠于神位前凡奉香授篚皆在獻官之左授爵奠爵准此幣皆在獻官之左謁者贊執笏俛伏與小退再拜引詣后土氏神位前西向立贊跪搢笏

執事者一人奉香合執事者一人奉香爐謁者贊三上香執事者奠爐于神位前大祝以幣篚授獻官獻官執幣獻幣以幣授大祝奠于神位前謁者贊執笏俛伏興少退再拜引獻官降自北陛詣國稷后稷氏神位前上香奠幣並如國社后土氏之儀訖謁者引降復位小頃贊者曰行酌獻禮謁者引獻官詣國社尊所東向立執尊者舉簣酌酒執事者以爵受酒謁者引獻官升自北陛詣神位前南向立贊跪搯笏執事者以爵授獻官獻官執爵獻爵以爵授執事者奠于神位前謁者贊執笏俛伏興少退南向跪大祝進神位之右西向跪讀祝文訖謁者贊俛伏興再拜引獻官降自北陛詣后土氏尊所東向立執尊者舉簣酌酒執事者以爵授酒謁者引獻官升自北陛詣神位前西向立贊跪搯笏執事者以爵授獻官獻官執爵獻爵以爵授執事者奠于神位前謁者贊執笏俛伏興少退西向跪大祝進神位之右北向跪讀祝文訖謁者贊俛伏興再拜引獻官降自北陛詣國稷后稷氏神位前升獻並如國社后土氏之儀訖引獻官降自北陛復位諸大祝進徹籩豆如式贊者曰四拜獻官四拜謁者引獻官詣望瘞位北向立贊者詣望瘞位東向立大祝以篚取祝版及幣各由其陛降壇置於坎贊者曰可瘞置土半坎

謁者進獻官之左白禮畢遂引獻官出贊者還本位謁者引監察及諸
執事俱復拜位立定贊者曰四拜監察及諸執事皆四拜訖謁者以次
引出謁者贊者就拜位四拜而出社稷丞藏神位版典祀官率其屬徹
禮饌以降乃退○右議政崔潤德刑曹判書鄭欽之等議啓一前此築城
限日役民故各官無識監考軍人等專不勤力以待限日因此慶尚道內
朔延日昆南等各官城堡歲庚寅始役經今五年尚未畢築實爲未便其
沿邊各官城堡姑依平安咸吉道築城例勿限役日以各官軍人多少
量授城基限以畢築令監司都節制使巡行檢察一陸地各官人民令
自齎糧遠赴他官築城之役弊固不貲其官城堡勿役他官軍人各以
境內所耕多少量授城基限其畢役年年造築一南海之島民多居之
以至築城獨不置守脫有倭變無有統制之人誠爲未便巡審置守便
否 從之○癸卯行社稷宗廟祈晴祭○視事○知古阜郡事曹仲林
辭引見曰今年水災太甚民生可慮盡心救恤俾免飢餓且省刑罰○
濟州安撫使啓本州頗有牛馬賊盜殺無窮其弊不貲且恐良馬絕種
限風俗歸正除考刺字隨即大徵事下刑曹刑曹議啓盜殺牛馬者除
考刺字大懲律外之刑未可施行 從之○前奉禮鄭旗上言欲受職

上留之謂都承旨安崇善曰旗之爲人荒矣徃因和敬宅主之請授奉
禮近日又托和敬宅主求五品之職予不允從今又上言心行不肯允
特旨除授人有司以爲特旨雖不合之人不復啓達不可乃傳旨吏曹
今後雖特旨除授人或嘗犯罪或不合任事者則取旨施行○甲辰親
傳朔祭香祝○黃海道監司金益誠進箋乞免曰臣性稟庸愚才識薄
劣幸席先人之蔭獲參百僚之後累蒙 聖恩驟遷華秩以至二品願
無建明惟恐覆餗矧今控制方面兼總兵機尤所不堪重違 上命強
顏詢宣于茲八朔陰雨爲災山崩水溢損傷禾穀民失其天已爲驚懼
又有人命壓死四十七溺死十二震死八無緣路死一十總計七十七
人不祥至此一道偏受災變實臣否德所召不勝隕越固知所措伏望
奪臣爵命收臣使節以答天譴國家幸甚不允○都承旨安崇善啓曰
平安黃海道水災爲甚禾穀損傷黃海道又有山崩雷震之變請遣朝
臣巡審以聞 上從之命遣奉常少尹李師孟巡審○司憲掌令許詡
啓曰迎餞會飲已有禁令况今時令不順秋雨陰冷 聖上之憂已至
凡爲臣庶所當戒懼之時也側聞憂國大臣公然聚會動樂飲酒其恣
慢無忌孰甚於此義當亟問第以風聞之禁未得擅便敢啓 上曰予

已知之又啓曰命還尹得氏職牒臣等竊謂雖罪重於得民者今皆還
給然得民所犯雖未畢推不廉形狀既已著見蒙宥足矣又還職牒則
無由懲戒 上曰此事既未見推倘至見推不過徒罪還給何害○八
月乙巳朔兵曹啓今年請畢築忠清全罪慶尚三道各年始築未畢城
堡其南海築城曾以船軍役之除極寒暄熟防禦最緊時外連續造築
且海門要衝金海邑城亦於今年始築 從之○傳旨戶曹國用各色
衣服臨時急迫麤率製造其不可也今後預造四節衣服各三十件截
于濟用監以爲恒式○都承旨安崇善啓曰左承旨權孟孫左副承旨
鄭甲孫右副承旨尹炯同副承旨黃致身等以會款被憲府之劾各退
其家 上曰何日事也崇善啓曰前月十八日事也 上曰過夜飲乎右
承旨鄭奉啓曰臣聞非過夜飲也夜半乃罷各歸其家 上曰召臺負
令速覈以啓○丙午濟州安撫使朴安臣辭將行 上命改差蓋安臣
妻矣甚劇故也○吏曹據咸吉道監司關啓知甲山郡事李仁和其界
山川險夷要害及野人情狀無不究知非惟有能防禦勤於民事民皆
愛慕從民情願復立僉節制使仍使仁和任之以久其任 從之○司
憲府啓左承旨權孟孫左副承旨鄭甲孫右副承旨尹炯同副承旨黃

致身等今方時令不雁宵(肝軫慮之時以近臣不體至意憑藉饑客公然聚會卑賤人家招妓作樂且用牛肉固爲不當孟孫致身掌辦是會尤爲不當 上謂近臣曰用牛肉人人之所犯也昔許遲爲大司憲時啓曰臣常犯杖一百之罪此言甚直達官之宴伶人娼妓之往終亦常事也予何咎焉但承旨職掌出納非他臣下之比權要出於議政之上今孟孫等不念予畏天謹災之意會于卑賤人之家恣行宴會當並罷之但得人爲難其罷孟孫致身之職令甲孫炯就職先是孟孫甲孫炯致身等携妓夜飲于鑄字所又飲于喪人司鑰李夏之家餞各道監司識者非之○丁未視事 上曰幹木河野人等自相漏言允察等謀欲害寧北鎮守將將移居于婆猪江其真偽未可知也邊將故爲不知乎示以知之之意乎右議政崔潤德啓曰邊將言其實情使允察等畏而恥之可也寧北鎮守節制使李澄玉在伯顏愁所僉節制使河漢在會寧鎮會寧鎮野人來侵初程也新進之士雖有驍勇之才在初程備作候則可矣若禦大敵則不如位高老成之將也請移李澄玉于會寧以河漢鎮守伯顏愁所何如戶曹叅判沈道源啓曰臣等往巡幹木河之時聞野人之言曰吾等願居城外有賊變入城避之築木柵於所居安知

野人等佯示久居之意而出其不意擄掠而歸歟然臣等未見野人移居之意也會寧鎮野人來往初程也請從潤德之言 上曰予計不出此其更議之都承旨安崇善啓曰野人豺狼之徒不可以仁義化之況以傳聞之言說之乎假令說之反懷疑貳何有愧恥之心不如不言之為愈也密伺行止如有其變將帥臨機處置可也 上曰所言甚合予意姑觀其勢○司諫院上疏曰竊謂書曰令出惟行不惟反夫令之不行必自近臣始也法立於上而近臣先犯下民奚則令之不行職此由也今當陰沴之日 殿下修省軫慮左承旨權孟孫左副承旨鄭甲孫右副承旨尹炯同副承旨黃致身等以近臣不體 上意首犯條令率妓及伶人夜飲常僕之家既為不當又違制書公然用其禁肉放恣莫甚憲府覈實具聞而只罷孟孫致身之職甲孫炯等命令復職孟孫等罪不在青災不以公斷特垂寬典臣等為 殿下憾焉伏望 殿下將而孫甲孫炯致身之罪依律科斷以固邦憲以戒後來公道幸甚不允○禮曹啓驪興人禹承慶妻袁氏早歸禹氏能執婦道承慶年纔四旬於壬子夏遘疾而死梓桶哭泣出於至誠及至葬期欲葬其家近地宗族皆曰幽明異境義不可近也強止之不聽乃言曰幽明雖殊心豈

有間且僕隸鮮少亦無後嗣若葬遠地則詎其致祀乎近則我當親之我死之後亦必同穴遂葬于距家十步許自始至今雖析寒暑雨隸行朝夕之奠其爲計活奴婢各一破屋數間而已饔飧難繼雖蔬菜麥飯不廢朝夕之奠宜復戶給米十石從之○刑曹啓各司奴子除司謁司鑰四品已行人外五品以下受職人等或除下而有職牒或犯罪收職牒而還受者稱有職閑遊不可也年未滿六十者勿論職牒有無令冬其司役使從之○傳旨禮曹慶尚道東萊縣及京畿江華栽植倭楮未有考察培養之條恐將絕種令監司每年夏秋開具榮枯之狀以聞○戊申吏曹以京畿通津忠清道牙山等官戶滿五百依續典差教導從之○已酉視事上曰禾穀已熟乎左議政孟思誠等啓曰臣等聞早穀已熟晚熟未熟耳上曰昔年八月初六日入節十日後因祭先陵行過原野禾稼已熟今年入節既踰一旬尚未盡實專是秋霖之故也然田穀不實年前尤甚今年田穀較之何如思誠啓曰惟大小豆則勝於前歲遠矣上曰今夏雨水適中禾穀茂盛尚有西成之望入秋以來雖無大水霖雨經月不霽其於結實乃何思誠啓曰臣聞黃海平安兩道內雨水專失農業唯慶尚道爲上全羅道次之忠清道則爲半不

實 上曰予聞江原道唯嶺東禾穀稍盛耳○親傳風雲雷雨祭香祝○
前此咸吉道監司金宗瑞啓會寧住居野人等類或遷徙或仍居其心
難測且張天使不無出來以秩卑僉節制使防禦於瞻視似乎劣弱彼
人去留定計之間姑令寧北府節制使李澄玉仍鎮會寧以嚴瞻視本
邑之事來往治之何如 上令三議政何敬復沈道源等議之僉曰防
禦緩急難以遠度姑從監司之請 上從之至是更議曰予前日已從
卿等之議然議者曰姑令李澄玉仍鎮會寧乃一時之計耳若圖久長
之策寧北會寧永永相換此議何如倘或相換則居民所耕足不足可
置巨鎮便否擬議以啓黃喜等啓曰不可遠度使監司都節制使寧北
鎮節制使同審以啓後更議從之○上曰許稠啓乃而浦等處倭人多
來居之因萬戶南友良之赴任請書其數以送友良書送甲辰年以後
來居之數男婦共三百六十許以此觀之已前之來未知幾許今雖畏
威投降其心詐譏終不可信諺曰乞宿門庭者謀諸閨房今當盛治之
日倭之爲寇無足慮矣然天地之氣尚有盛衰帝王之治理亂相乘今
我盛朝雖曰極治千載之下安知不如今日乎次杜後患當於不顯是
圖予以稠言爲是然未領其處置之宜如之何則可乎喜等議曰許其

來居今已久矣及今拒而不納晚矣且分置各道則彼必生厭進退難斷姑仍其舊臣等但願今年先築金海邑城次築乃而浦縣城脫有倭變使民移入避患可也崔閔德啓曰縣城令抄右道水軍築之可也又議曰先世相傳文書未知藏之何處喜等曰宜藏璿源殿以憑後者皆從之○初霖雨連旬禾稼損傷上憂慮時李順蒙爲慶尚道都節制使趙從生爲金羅道都觀察使行大護軍朴去非行司直洪居安同設宴於居安第請致順蒙從生餞之又請居安同里前判書朴信參贊李孟昉行僉知中樞院事閔義生吏曹參議權復等來會判典農寺事金良前南陽府使尹敞去非弟副司正去疎等亦來參權復時爲慣習都監副提調招妓及伶人作樂司憲府聞之使掌令許詡啓曰禁迎餞會飲既有著令且今霖雨爲災軫慮之時大臣勸樂宴飲臣等欲劾之恐有風聞之責未敢發舉上曰予已知之矣退而劾啓曰既有群飲之禁又下戒酒之教今當遇災軫慮之時大小臣僚所當恐懼修省之際也朴信李孟昉閔義生等以大臣不體至意不遵邦憲公然宴李順蒙趙從生等典司方面所繫非輕不體委任之意以不緊之故煩瀆啓達過朔淹留動樂飲餞權復金良尹敞朴去疎等無所知畏然會宴飲

朴去非洪居安等不畏邦憲共備酒饌招集賓客並皆不當按律居安
良敵去疎並杖九十信孟昉義生順蒙從生復去非請按律科罪奉教
罷順蒙孟昉從生義生復等之職良去疎以功臣之子亦罷其職去非
亦以功臣之子只收職牒居安杖七十信敵以前銜勿論順蒙永陽君
膺之子也以父蔭官至同知摠制已亥征對馬島有戰功陞資憲前年
征討浚猪江多所執獲陞判中樞為人狂淫浮蕩嘗往慶尚道拜掃母
墳回還携尚州妓行至聞慶縣草站與妓浴于川携入樹蔭下大呼曰
與妓行淫即淫之狂蕩如此○庚戌御勤政殿受朝○九察使人來獻土
宜○行祈晴太一醮禮于昭格殿○辛亥以閔審言為同知敦寧府事
全羅道都觀察使朴坤漢城府尹鄭萃左承旨辛引孫右承旨李堅基
同副承旨趙遂良言憲執義曹沆典農寺尹金寧司憲掌令李蓄典農
少尹曹備衡慶尚道都節制使趙從生全州府尹高若海判黃州牧事
崔海山濟州安撫使海山前征婆猪江失誤軍機罷職至是為濟州濟
州越海絕域人皆不願為沆及蓄都承旨安崇善之姻婭也賴崇善屢
遷至此都承旨之任摠掌出納兼掌銓選一時權寵無以加焉左承旨以
下靡然趨風敷奏覆逆皆議問然後出納施行崇善為人狠愎亟疾易

怒易喜同寮或違誤其意輒辱之同寮皆怨惡當除授之時兼判吏曹
左議政孟思誠善柔不銜判書申槩等從而唯諾詮選皆出其手姻婭
之徒與平日所善人及子弟任其薦用○壬子原州判官羅洪緒辭引
見曰初聞其道未穀稍盛今值雨水不無損傷汝往乃職惠恤民生慎
爾用刑○上曰今改作隆文隆武樓役徒喧嘩或高壓宮內欲移臨瀛
君第役畢乃還毋煩隨從唯承政院兵曹鎮撫所從之入直節制使宰
樞皆令守宮○癸丑視事 上曰秋雨日以禾穀必損矣都承旨安崇
善啓曰久罹陰雨則穀頭生角 上曰田穀亦如是方其久雨忝實零
落猶亦盡偃今年禾穀比前年如何崇善啓曰臣意以謂比前年頗好
然未知其終也 上曰下三道亦有水災乎崇善啓時未來報○左承
旨鄭奉以父病辭職不允許令侍藥○還給李原忠裴賡等職牒○甲
寅御經筵初令經筵官撮資治通鑑大全所不載於綱目者故停經筵
至是撮畢始御經筵○黃州判官白瑠辭引見曰今聞其道禾穀多損
益加愛民慎爾用刑○初 上因陰冷之灾宥待罪還職牒成衆吏
典許令叙用不緊營繕一切停罷允民冤抑皆欲伸之因此不逞之徒
或叙功干職或叙已冤抑而擊鼓上言者甚衆或越訴或叙已冤而情

理無狀可罪者下刑曹治之刑曹推覈越訴者以違令答五十情理無狀者以伸訴不實杖一百論請 上曰本以慰悅人心而反罪以重不可也爾等議輕重以啓都承旨安崇善等議啓曰情理重者杖七十輕者答五十施行何如從之○咸吉道兵馬都節制使報兵曹曰去庚寅年野人寇慶源鏡城等地虜去人民爲奴婢使喚土地隔遠之時則已矣今設巨鎮逼近野人之境被虜唐人連續逃來我國被虜之人無一逃來者必是安業住居無還心若不此時刷還非唯野人無所戒我國賤口効此而背國潛從者有之矣乞皆刷還何如令三議政及河敬復沈道源等議之僉曰待北方城郭完固居民安業兵力有餘然後徐觀其勢更議何如從之○乙卯御經筵講名臣言行錄至劉安世死日大風飛驟兩雷電人皆驚走俄而器之死焉人人異之 上問曰何天變如此史官權枝對曰朱熹死日亦有雷雨之變時人謂括人之痿天亦變動 上曰然○命解曆筭者直集賢殿金鑰等三十一人會興天寺推筭綱目通鑑所載日食○判右軍都摠制府事致仕鄭以吾卒以吾字粹可號郊隱慶尚道晉州人也中洪武甲寅科丙辰拜藝文檢閱丁巳除三司都事歷工禮兩曹正郎典校副令甲戌出爲善州戊寅入爲去

常小卿建文庚辰除成均樂正恭請王冊我 太宗爲王世子接見則
必陳兵衛以吾上書極言其非都鎮撫趙溫白于 恭靖王請鞠問之
人皆危之以吾曰旣爲 王世子則父子也焉有父子而陳兵相見之
理乎於是 恭靖王以兵柄盡授 王世子曰撫軍監國世子之職此
儒之言甚爲允當人人皆賀歷兵曹議郎校書監藝文館直提學成均
司成癸未除成均大司成乙酉拜工曹右叅議歷禮曹右叅議丁亥准
恭安府尹辛卯檢校判漢城府事歷藝文館大提學戊戌議政府贊成
致仕己亥判右軍都摠制府事致仕壬寅患風疾兩 上各遣醫治之
以吾質直無華恥言人過失不事生產自爲舉子常遊牧隱圃隱之門
已爲儕輩所推及擢第登顯仕常帶待製其爲詩文駿迅雅麗至於試
課程品略無差失然短於處事及卒停朝市二日致吊致賻諡文定學
勤好問文純行不爽定有子一曰峯○丁巳御經筵○戊午親傳秋夕
祭香祝○己未親享于 文昭殿 王世子亞獻○建州左衛指揮童
允察遣管下用女直文字獻書譯之其辭曰楊木答兀擄掠中國人民年
前裴俊押率還本今吾等貿易使喚人民逃歸邊土邊土衙門官吏不
即分辦皆以爲楊木答兀所擄人民送于上國深以爲悶今領議政黃

喜等議之僉曰宜答以被擄漢人思戀本土而來事大之國其肯不辭
送手實是汝等貿易之人奏聞還受可也從之○庚申御勤政殿受朝
○御經筵○下金龜集新舊二件于春秋館記高麗故事之書也○漢
城府啓私處捕盜人賞給無定數徵給爲難贖六典官物偷取人捕者
賞給以五分之一爲額米則於十石給二石錢文則於一千文給二百
文乞依此例徵給從之○司憲府啓卒判府事李和英後妻童氏專以
夫家田民及夫繼母尹氏田民營構大家而居之於祠堂基地造淨室
掛佛像其夫及祖上神主置諸卑陋之處反令貧居初妻之子李安貞
造祠堂安神主至使祖上神主無所依歸不孝莫甚且尹氏恩義最重
而其神主至今不附於廟請按律科罪破佛堂造祠堂依例奉祀從之
原其罪勿破佛堂○辛酉經筵輪對○以安壽山判中樞院事吳陞議
政府叅贊趙齊判漢城府事沈道源禮曹左叅判金益精戶曹右叅判
朴信生同知中樞院事李士寬戶曹左叅議金一起戶曹右叅議李宣
兵曹左叅議金世敏兵曹右叅議辛引孫承政院左承旨鄭甲孫右承
旨尹炯左副承旨李堅基右副承旨柳守剛同副承旨許之惠工曹右叅
議李士信僉知中樞院事安止集賢殿副提學守剛左議政廷顯之嫡孫

也承蔭至此○初婆猪江野人瓦大率其妻逃來閩廷曰我等元係本國人居咸吉道孔州雍丘里被野人虜去爲奴使喚不勝艱苦逃來監司具辭以報令議政府六曹議之領議政黃喜等議曰宜荅以瓦大夫妻皆以爲本國人故姑令留之實是汝土之人則汝等分辨開寫其父母姓名存沒居處親疎族人無多小授族人一二名送來其族人出來對正後更議其根脚真僞今咸吉道監司推其雍丘里古老人以啓刑曹判書鄭欽之等議前日金自還之受邊境生釁不可勝言今此二人雖曰本國人其真僞既不可知其妻之事尤爲可疑得之不足爲多失之不足爲小後日如此輩見此二人被留若不得志於彼又稱本國人口逃來於我我依前受之邊境能無釁乎宜勿受以絕豐端戶曹察判朴信生等議今以所納之招觀之瓦大年今二十八歲去庚寅年見虜雖無他證理或然矣其妻年今二十一歲生在庚寅之後灼然矣且年前五月俘虜上京之時不言其爲本國人今更窮推以不識年歲言之觀其情狀似欲依附其夫以避本主之役使矣然二人旣爲夫妻或受或不受於人情亦難宜荅以二人原係本國不可發還以觀其勢何如從黃喜等議○壬戌日暈內淡黃外淡白

○受常參○上謂都承旨安崇善等曰大臣多疑納此瓦大夫妻後日
生豐有悔予不知其故也今被虜唐人連續逃來雖無朝廷之命予
遵祖宗故事解送遼東別無生豐今納本國之人而有天豐際乎本國
之人被虜為奴不堪其苦逃匿而來何忍去之昔唐吐蕃維州本唐
土地維州之人背吐蕃來唐牛僧儒等議而勿受還之吐蕃慘殺境上發
世為之寒心今以納金自還生豐為悔金自還之事實天為之也征討
婆猪江雖糜費糧餉損傷馬匹斬獲實多威加胡虜萬世之利也何悔
之有崇善啓曰已亥東征之役雖我師不利倭寇畏服追至于今邊境
無虞今婆猪之役軍卒無一不還野人畏威誠萬世之稱服也 上曰
爾將此意諭諸大臣○輪對經筵○賜野人千戶童昆赤等二人衣服笠
靴○禮曹啓蓮花臺呈才微臣詞有感君王之德化來呈歌舞之歡娛六
句辭語屬上用之於賜樂誠為未便然而 東宮及宗親議政府六曹
慰宴使臣皆用蓮花臺呈才其來已久且無尋呈才其歌辭專用佛家
之語足為誕妄况年前昌盛亦欺之今後允諸賜樂乞罷無尋呈才復
用蓮花臺去其微臣詞則鄉唐樂俱全而臣下用樂節次有序矣從之
○義禁府啓私奴每邑金莫同金難大禿同等潛通倭人放賣白銀律

該斬從之○癸亥視事右議政崔閔德啓曰九察姦暴人也出境外必
交連兀狄咎爲害於邊境今寧北鎮近於九察所居使喚唐人連續逃
來本國納之解送遼東凡察必有憾焉朝廷未有送還之命願自今逃
來唐人實是九察所買者勿受送還九察所遣之人厚賜衣食待之以
恩羈縻撫綏毋使出境 上然之閔德出 上謂安崇善曰待九察區
區厚賜異於他日則反生疑懼古人有言幣重言甘誘我也區區厚賜
亦未便九察甚姦暴前日邊境之人入歸其穴射殺之今在吾境內尚
且無禮於寧北鎮節制使若出外境必爲邊患俟其據掠移徙之時
而圖之則緩不及期有可圖之豐及期殲除可也以此意潛諭邊將何如
爾將此意議諸大臣初童猛哥帖木兒及子權豆爲楊木荅兀所滅帖
木兒弟九察朝京師繼帖木兒爲都督僉事新授誥命印信來斡木
河時我國初置鎮九察反側未安○禮曹判書申商啓曰進九察使人
昆赤于禮曹言曰汝輩所虜中國人民欲還本土而來故以事大之國不
得已奏聞入送若汝等交易之人則奏聞還受可也昆赤曰若非交易
之人則何煩仰達昆赤欲言聶嘯臣曰有欲言之事則言之可也昆赤
曰今逃來人等誣言于本國曰凡察謀衆曰飲寧北鎮節制使酒以醉

棄間殺害此言請勿信聽倘使節制使飲酒以醉滿邑人民其能使之
盡醉乎其妄言明矣臣答曰本國何信此言亦焉能有此理乎昆赤扣頭
再三曰今聞大人之言歡喜無二上曰逃來入之言何以知之申商啓
曰初到寧北鎮言說時聞之者必傳傳漏說上曰然○輪對經筵○
通事張俊回自遼東啓曰猛捏可來王武等兩使臣曰我與王欽等往
忽刺溫地面本國被虜人十四名內刷得四名身死二名其餘八名未
盡推刷故欽率其處兀狄哈赴京待欽回來九月十日時發向汝國即
以刑曹右叅判李叔取爲遠接使更待聲息發程○刑曹啓咸興囚李
元祐以慶源築城總牌率軍逃來時打防護人金興達律該斬命減一
等○甲子御經筵始講論語○上林園沉藏庫所種正月雨下草實今
乃盛長開花即馬藜草也○咸吉道監司啓寧北慶源府今年木穀或
有稔處或有不稔處其稔處收今年租稅之半其不稔處只收三分之
一從之○判中樞院事安壽山卒壽山慶尚道順興人也中官之舅
也累遷監察持平除判通禮門事己亥拜僉摠制進同知敦寧府事歷
工刑兩曹總判丁未知敦寧府事甲寅判中樞院事壽山寬厚謹慎然
疎薄正妻溺愛妓妾治家無法時議非之及卒停朝市二日官庀葬事

行特厚致吊致賻謚昭簡容儀恭羨昭平易不訾簡一子九經中宮
養於外祖天保之家故壽山蒙恩最厚壽山發瘡將死兩殿連遣中
官問病絡繹於道爲開轉動政陞秩寵異之醫朴居以疾瘡失誤安置
于所居鄉○乙丑御經筵○丙寅御經筵○御思政殿設養老宴如儀李
龜齡年八十九宴將訖啓曰老臣曾經咸吉道都巡問使與察理使深
知本道之事昔侍中尹瓘征討豎碑之後幹木河之地鞠爲茂草爲野
人窟允今方聖德深重命將西征全師獻捷又幹木河置二巨鎮以嚴
關防老臣欣覩盛事不勝喜慶又啓曰肇興養老之禮優待老人甚盛
舉也且制作禮樂典章文物煥然悉備臣尤喜慶臣年已老圖報末由
但祝聖壽萬年又以臣之年筭期聖壽而已上曰已知卿之美
意幹木河等處祖宗舊地不可虛棄予承祖宗之蔭至於如此老
臣等欣慰予亦喜悅且年前卿瘦弱今年豐潤予甚喜老宦金亮獻詩
以美聖德上曰知爾美意耆老等醉飽或扶杖或子弟挾持從容
罷歸大平盛事也○丁卯受常參輪對經筵○禮曹啓平安黃海道今
年雨水山崩壓死男女共六十四名○上曰今年凶歉平安黃海道有
同異乎安崇善啓曰以兩道監司之報觀之則同矣然以李師益之啓

觀之水田則稍稔 上曰或有言者曰毋送大臣于外而生弊毋築城
堡而勞民此皆目前之計而非慮遠之謀也太臣出使于外則豈無支
待之弊築城亦勞民動衆之役也然安於昇平不以城堡爲急則向之
言弊者其可自救其患乎此予之所以不以取者也且慶尙全羅忠清等道
非平安咸吉道之比當此無事之時宜急築城以備後患○戊辰受
常參視事輪對經筵○司憲掌令許詡啓曰臣按經濟六典議政府
堂上坐次截然不可犯也兵陞今以崇政爲參贊如從散官坐於東壁
則有乖於職事以職事坐於西壁則有乖於散官以六曹觀之判書雖
崇祿崇政參判則皆嘉善嘉靖六曹尚然况議政府百官之長一位嚴
於一位非他司可比者乎陞不得已爲政府則已矣若非不得已則請改
除他官以正政府坐次 上曰昔李叔蕃以崇政爲參贊古有其例
一品參贊何害焉且參判將以資憲正憲除授亦何害焉陞爲人善
柔不斷不合政府憲府托以坐次而請○禮曹啓全羅道興德人生負
李仲瞻勇於從父之命能守祖父母墳墓勤於朝夕之奠孝行特異乞
叙用從之○戶曹啓平安一道虫水損穀明年之種不可不慮請今年
收租實田一結以下令納穀以爲明年之種從之○禮曹啓以補充

軍屬樂工者或至十二三年未得受職兵曹補充軍四朔相逝立齒而考其任日受隊副長之職今屬樂工補充軍依此例以任日多少授隊副長之職仍屬樂工從之○以中樞院副使金益生代李皎為忠清道兵馬都節制使國制節制使二期而代皎為人便習善割烹時有朝廷使臣出來之言司饗提調李中至等啓宴使臣時無上前割肉者未滿二期而代之○已巳 中宮御思政殿設養老宴如儀○刑曹啓私奴未同聞介吾未奸其妻欲問其狀拳毆介吾未背致死宜論以鬪毆殺人之律然只毆二度不應遽死且其時朕病醫亦云頭胷病證身體痿黃則恐別因他故而死似未可以毆殺論也按大明律九保辜者辜限內因傷死者以鬪毆殺人論雖在限內傷已平復別因他故死者各從本毆傷論以手足毆傷者答三十然人命至重亦未可以答罪論也比律定罪為難取自上裁下議政府諸曹議之領議政黃喜等議宜論以鬪毆傷右議政孟思誠等議請於鬪毆殺律減等命杖一百○庚午 上及 中宮東宮移御于臨瀛大君璆弟○刑曹啓刑者人之死生係焉聖人之所甚重而欽恤者也檢律京外罪囚莫不科斷苟非精通律文則案律之際豈無輕重死生之或謬以至於含冤負屈者乎然則律文

講習之法不可不重也故勸學之方條列于後一律業出身者講其所學則不解句讀者間或有之安有講讀精熟融會本末者乎提舉以下常仕率領講習之法已立而爲律學者妄謂自足多般托故不肯講讀今後每日講讀置簿務要精熟提調常加檢察如有托故不讀者削其日仕到一七品去官者稱訓導仍仕本學講習律文每歲抄考其勤慢京外六品去官之法已立然無試才之法懶於習讀每月提調考講書其通不通歲抄叙用時考其考講畫數仕到多少其中能通律文可任吏職者京中東班外方守令中叙用勸勵其迹兒除授亦依此例一律令乃庶司官吏所當講習也惟律學者專業而他皆不學故吏科試取并試律文之法雖在今甲然其赴舉者皆非講熟之人故當其任事之日如有按律皆歸斷於律學誠爲不可今後欲試吏科者並赴本學講習律文待其精通許赴校書館試一外方大小各官皆有律學生徒其數頗多並無師受而徒爲虛設自今各官各舉年少聰敏者二人來赴本學待其講習精熟並令還鄉其中所業卓異自願本業出身者或歸吏科者聽一律學之人雖所業精熟者陞授六品之後更無從仕之處且七品以下新進之輩按律比附恐有差誤失中之患本學訓導官

二人又加二人以六品以上律文精通衆所推服者常仕本學摠攝照
律及教誨後進等事其褒貶叙用之去一依他處口傳官例施行一稱
律學者乃諸學稱號之通例也有祿官衙門通稱律學未便改稱司律
院從之○頒賜選詩演義于臣僚○召領議政黃喜等議曰右議政崔
閔德之往平安道或曰可或曰不可何以處之教閔德曰無嫌于已以
國家大體共議以啓黃喜議曰彼雖凶頑焉能突入江界以寇乎唯江
邊則未可知也然節制使在焉豈可以大臣建旆設旗常在疆圉乎益
思誠議曰彼界城郭未完宜遣大臣益嚴邊戍閔德議曰年前制勝非
小臣武略專是 殿下神武所致也今者彼雖來降乍臣乍叛其心孔
艱以臣庸愚無以鎮服然彼人若聞臣往必以爲嚴兵固圉臣當往矣
又議曰右議政下去則軍容都巡檢使稱副使偕行何如閔德曰大臣
并行則不無支持之弊臣當兼察軍容喜等皆然之又議曰昔雖傳聞
使臣出來即遣遠接使今也張俊親聞使臣出來之言而來遠接使不
即遣發倘不及義州則使臣必以爲薄矣何時發遣乎僉曰來九月十
日間可遣又議曰宜山君南暉入朝時禮部尚書曰 皇帝以忽刺温
擄掠本國人口推刷遣使於本國無乃有弊乎不用女十餘名雖不推

還何害南暉對曰非臣所知也尚書曰第言之南暉曰 皇帝差人推
刷本國感戴不淺何弊之有且如此事若不推還後日之事不可不慮
尚書曰是矣吾將圖之此言毋洩於崔真今也千秋使朴信生入朝朝
廷若問上項事由將應之曰朝廷不因本國奏請於忽刺溫險阻地面
遣使推還 殿下感謝至矣若不問則不言何如僉曰 上教允當又
議曰朴信生入朝遼東及中朝管事官人等若問野人牛馬人口盡還
與否何以答之喜等議修事目曰人物則年前欽奉 聖旨即日差人
推刷無遺叒回獨帖兒漢等五名元係本國具辭奏達留置 聖旨有
云兩相和順彼亦改心歸順再三請還父子夫婦相離之情誠可悶伶
國家已曾送回馬匹則無處不推亦已叒還間有姦民隱匿不見更差
人搜覓壯兒馬共幾匹上項帖兒漢一時入送事答說不問則不言從
之○辛未右議政崔閔德啓曰臣受鎮邊之任固當往矣彼若犯邊義
當窮追軍官不可無也年前以臣率赴軍額量減定給且曰崔致雲不
可帶行也其他閑官中擇能文可任公幹者許令帶行從之○兵曹判
書崔士康等啓曰今秋講武江原道京畿侍衛牌勿使隨駕然講武不
爲則已爲則驅軍不可無也况兩道侍衛牌專以驅軍勿使番上以休

其力臣等願並隨駕仍啓各道軍容點考皆遣大臣然一時盡點則不無搔擾之弊臣等願今年只點官軍容其餘各色軍容待後年更點何如從之○全羅道全州等十三官地震○壬申長城縣監崔湫辭引見曰全羅道連年凶歉予甚慮焉今年則稍稔往就乃職敬慎刑罰○分遣刑曹判書鄭欽之于忠清全羅慶尚道漢城府尹朴坤于江原道巡行州郡審定城基○樂工權孝生告承政院曰私奴黃福屬予曰弟日流盜金佛與金字經燒融用之予以兄弟之義不忍告也汝往告之都承旨安崇善啓曰日流所犯雖曰不道其爲兄者所當隱諱乃今陰發他人謀害骨肉法當痛繩孝生幸其受賞從黃福不義之誘以不干自己之事無緣越許罪在不赦國家設容隱之法所以杜此弊厚風俗也近日告人盜金從而受賞者非一無識之徒緣此蜂起以至兄告其弟風俗之偷一至於此願令刑曹推覈以聞從之○前叅議高得宗上書曰臣鄉濟州曩在乙卯車玄有內成之輩爲馬賊其時萬戶欲抄軍捕之機洩反爲賊所害賊益熾欲專權背國構逆扇亂無所不至土官等仗國之靈克正其黨蓋本州山林鬱密幽穴甚多作賊之人聚爲淵數每歲潛匿盜殺公私牛馬若此不禁弊將難救國家將上項之賊並今

出陸皆移平安道地面此小臣素所願也但今鄉人來言連歲凶歉人無粒食今則馬牛之賊尤多臣竊思之君子雖當困窮之時固守其節矣小人則飢餓切迫之極救死不贍其能有廉恥之心而不爲不義者乎無恒心之徒盜殺爲食者乃多有之若不問所犯之由逮捕緣繫之人皆於一時督令驅出使父子不相見兄弟妻子離散則人皆浮動其心群凶叢憤聚入山林爲害不小恐昔年之患或作於今日矣伏望殿下察臣愚衷再犯盜殺者外今因年飢爲盜者姑令仍置以安反側用改前心自今以後作賊之人雖初犯隨即出陸置之遐道則庶幾馬賊自絕而汚俗惟新矣 上令三議政兵曹議之僉曰依上書施行從之○刑曹啓僧海尚殺僧海觀律該絞從之○甲戌親傳朔祭香祝○還給金子惇職牒○司憲府上疏曰安不忘危誠爲守成之長策時屈省事亦是救民之權宜 殿下旣於四道分遣大臣巡審城堡又於八道將遣大臣巡檢軍容其保邦于未危之慮切矣臣等竊謂近年以來水旱相仍民生不裕今年禾穀雖曰稍稔慶尚全羅忠清等道去歲凶歉有甚於他道今年各道又有或旱或早加以風損而京畿黃海江原道尤甚焉大臣之行相繼駢至騶從送迎公私俱擾 殿下雖戒以省

弊煩擾自如未若不遣之爲愈也若平安咸吉兩道容有戒備不得不遣其餘各道非若兩道之爲急臣等伏望亟收其命特命監司精察利鈍具錄以聞其有未完按律科罪則守令軍民孰不警省如不獲已權且擇其三品以下剛明爲公諳練軍務者單騎往閱則公私不擾器仗堅利守成之長策救民之便宜並行而不悖矣 上曰立法之時旣議勿論豐歉何改此法○九月乙亥朔吏曹啓改功臣都監稱忠勲司以四品爲知事以五品爲都事並皆口傳參外則仍存丞錄事之號從之○吏曹啓革昭格殿書題合于道流定額二十兼行書題之任從之○丙子司憲府啓參議成志道昌寧府院君石璘嫡長子也其弟參贊叅道之誓金連枝金守智宋石同等有祠堂之家分而有之凌辱志道殊無尊祖之意風俗不美莫此若也然事在赦前不可追論當取家舍給其志道從之○以崔士儀同知敦寧府事金益精漢城府尹奉礪戶曹右叅判李明晨兪知敦寧府事趙注左獻納牟恂右獻納○司諫院上疏曰當閑暇而備不虞爲國之常規視豐歉而合時措爲國之大權爲國之經有時而變則爲國之權隨時而出此古今天下守經行權之不可偏廢也今國家歲遣使臣巡檢軍容此爲國備不虞之常經然去年

水旱爲災禾穀不實民乃艱食幾於阻飢特蒙 聖上發倉之恩得免
飢餓德至渥也今年農務雖曰優於去年會當西成之日淫霖連旬水
溢沙覆致傷禾稼歲之不熟不減於去年雖盡輸一歲之收不足以償
公私之負債此乃民生拾粟秋耕以備將來之時今分遣大臣巡檢軍
容允諸名在軍籍者望風奔走之不暇安有拾粟秋耕之可望乎若東
西界則境連野人雖至凶歉不虞之變不可不慮其餘也道時無警備
不須巡檢伏望 殿下權從前例令其道監司兼檢軍容姑收分遣大
臣之命民生幸甚 上曰爾等之言善矣然議諸大臣以爲子孫萬歲
計耳近日憲府與識理者皆曰不可今爾等之言亦然若以年儉停之
則假令明年亦歉如之何立法未幾而尋又更改則所謂朝鮮公事不
過三日也國之大事豈可以年歉而廢乎予處九重之邃宰相與三品
以下支持之弊其輕重雖未悉知然今日之判事明日之宰相處事
雖曰不異然以大臣掌大事重其事也今爾等語小而遺其大在所不
聽○刑曹啓鄭吉生殺人律該處斬從之○丁丑行北郊祈晴後報祀
祭○已卯頒賜大學衍義于宗親及臣僚○庚辰遠接使李叔畝發向
義州○洪智與前縣監柳宗相鬪言及國家京畿監司使永平鐵原之

守訊鞠智在獄中而死其子裕仁上言曰差使負連日醉酒偏加枉刑
腎根浮腫而死願推鞠解寃 上乃令監司推覈以聞○辛巳差司譯
院判官吳貞貴押解逃來唐人劉仲孫等三十五名于遼東○咸吉道
監司啓指揮禹者顏帖木兒賚三勅書到幹木河近境其一兀狄哈巨
乙多哈處童猛哥帖木兒管下生存人牛馬還給事也一兀良哈處今
去禹指揮言詮聽知事也一童九察處內官張童兒指揮王息等秋冬
發遣事也○前知中樞院事權希達卒爲人強狠忿戾有類豺狼故時
人目強暴之人曰權搥制 太宗錄其潛邸舊意遂致高班及卒停朝
市一日致吊致賻謚威戾猛以強果威不悔前過戾有二子曰鞞曰軸
○壬午未明 中宮還宮卯初 大駕還宮○召議政府諸曹判書議
事一指揮禹者顏帖木兒到幹木河何以待之喜等議曰依裴指揮例
賜給衣服頭目則不必賜也盧閑等議曰使臣及頭目並皆不賜可也
接待之辭則僉曰 殿下聞到近境令小臣賚酒果問安若問慶源寧
北兩鎮何以設之則將應之曰本我國封疆之地童猛哥帖木兒請而
居之今既敗亡離散恐他人來接設兩鎮以復古境一唐焰焞貿易之
事問於禮部彼如曰義當奏達則進呈文有不肯之色則毋得貿易若

曰雖不奏達猶可貿易則除呈文貿易而來且此事宜極謹密庶合事
宜京城內不可潛隱貿易通州以東潛隱貿易而來何如僉曰上教
先當上曰賜給衣服從喜等議其餘皆從僉議○千秋使朴信生奉
箋如京師上率群臣拜箋如儀○癸未遣宣慰別監崔致雲往慰禹
指揮于幹木河贈衣一襲令以吉道監司給佩弓箭六人護送軍十名
隨致雲以往○全羅道處置使徐沉遣前隊副尹得荃啓勸捕倭寇即
以直藝文館卞孝文爲宣慰別監往慰之仍賜沉衣一襲並饋軍人賜
得莘衣一領○焰焞貿易之事依前議書事目送于千秋使朴信生仍
修呈禮部草付之其辭曰本國欽蒙大祖高皇帝以不分化外一視
同仁之義曾於洪武年間頒降捕倭所用火焞火藥物料緣本國工匠
未識煮取焞焞之法製造未精今欲用價收買未敢擅便呈稟施行○
乙酉領議政黃喜啓曰焞焞軍國所重義當奏達貿易若干秋使於禮
部進呈文收買則似乎自己之事誠爲不可殿下思欲貿易恐煩
天聽不敢奏請之語並錄何如判中樞院事許稠啓曰焞焞重物也宜
當奏請收買不可進呈文於禮部命都承旨安崇善賚事目更議喜等
見事目曰臣等未及見此事目故敢啓耳今見事目辭語具悉何必更

議傳青千秋使前此通事姜尚傳赴京時與本國內官鄭善相話而回
還不啓故罪之然本國入朝內官見本國人相話人情之常也若相見
語話則聽來啓達○詳定所啓唐開元禮皇帝講武儀皇帝服武弁之
服駕至埤所兵部尚書介冑乘馬奉引至講武所文武九品以上皆公
服依唐制大閱時兵曹判書著介冑從之○丙戌全羅道鹿島浦船軍
宋智裴宜俊各得青琅玕全體一枚以獻賜宋智米豆共十石裴宜俊
米豆共四石琅玕有巨細故也○前此本宮屬咸吉道鷹人海尺之類
頗多上思欲減損命本道監司磨勘至是磨勘以啓上覽之曰此
輩皆自祖宗代始役至今父子相傳以矣仍其前役有關勿補○丁
亥刑曹啓權孝生越訴黃日流偷金之事又借人信符入闕之罪從重
杖八十從之曰流以其兄所囑而告同自首免罪所偷消融金六兩三
錢乃輸工曹○戊子平安道監司據慈城郡呈移兵曹曰鴨綠江今因
大水變作淺灘自彼岸至此岸順流橫渡五百餘步廣五十餘步深二
尺五寸如有大旱則勢必益淺入馬易涉賊變可畏已令赴防甲士與
軍人二十二名把截使彼人不得渡入益嚴關防○己丑吏曹啓十司
書吏依六寺七監例九品去官從之○前此傳旨咸吉道監司洪原置

守便否熟審以啓前監司趙未生啓曰洪原咸興相距八十里間有大嶺曰咸關南北勢分咸興之守名雖爲二尹監司不治府事但少尹一身勢難分治若別遣監司置二守於咸興數往洪原察其民瘼使之無弊則不必更改而仍爲屬縣可也然洪原有二巨弊各社勸農里正每當衙日來往咸興其弊一也勿論四節捉魚海島轉輸咸興其弊二也救此二弊無他所圖必置守然後可免也論弊至此則洪原置守之便明矣然咸興監司所在而人物數少使客甚煩洪原合屬之日尚且不近置守之後必至凋弊矣論至於此則減損之弊明矣監司兼尹雖不可輕改依他道監司例除率眷赴任巡行各郡周平而適是亦除咸興之弊也洪原置守沿革至三者以不議咸興之弊也若議咸興之弊而并使之無弊則何至於三 上今議政府六曹及曾經其道監司二品以上議之或曰置洪原縣監革預原郡以屬咸興本府附近定平東西面亦割屬咸興定平附近預原土地割屬定平或曰洪原合屬咸興其弊甚多然降咸興爲牧則雖奪洪原可矣如其爲府則必不可矣定平東北率皆荒蕪預原絕無所產况其官奴婢猶爲咀呪經過使臣多不肯宿割屬於道內都會之處亦且不可乞洪原仍舊屬咸興 上乃令

咸古道監司訪問以啓監司金宗瑞啓曰兩邑各執偏見務成其欲不可盡信洪原咸興相距遙隔須置郡邑然後於民於國俱有利益不可革也預原雖稱斜路置邑已久不可猝革咸興府先王諸陵所在而太宗訖興之地則禮樂文物須當盛設以尊瞻視本府實戶不過二百四十餘時役奴婢不過百口主事螺匠五尉時在不過百餘人故一道都費送之煩供之費非惟不能支當禮樂文物凋殘甚矣興復之術不可不圖咸興府東面甫青社與洪原蘆洞社相距十里居民四十戶洪原東面平甫社與北青地山芥峴相距十里居民四十戶咸興西面州西社與定平黑隱夫全相距四里居民三十五戶咸興南面三平社與預原東面宣德社相距十五里居民五十戶預原南面禿山社與永興東面草即社相距一百五十餘步居民三十八戶洪原預原既在革罷之限蘆洞社居民四十四戶宣德社居民五十戶雖屬咸興預原洪原之幸然預原洪原土地褊少以蘆洞社割屬本府則以山芥峴以南四十戶補之預原宣德社割屬本府則永興草即社三十八戶補之定平黑隱夫全三十五戶并屬咸興永興定平北青則土地廣濶人民衆多雖或見割無損於治又府居各司奴婢及附近定平預原永興洪原散住

各司奴婢三戶爲一戶一百戶定爲官奴婢則咸興庶幾阜盛預原洪
原各遂其願於國於民兩便又令政府六曹議之僉議以啓曰依監司
所啓施行唯洪原蘆洞社距本邑甚近距咸興甚遠宜仍舊以咸關大
嶺爲界 從之○癸巳以李澄知敦寧府事趙末生中樞院使李叔畝
刑曹左叅判許誥刑曹右叅判田興仁順府尹許之惠刑曹左叅議許
侗工曹左叅議金聽工曹右叅議李壘司憲掌令李恭全知司諫院事
○濟州牧使啓本州凶歉米三百石豆五百石鹽五十石漕轉賑濟
從之○乙未上率 王世子幸喜雨亭觀戰艦○丙申停經筵自此以
後上以資治通鑑訓義修撰停之○命議政府六曹往審戰艦于喜雨
亭以分快鈍○丁酉議政府六曹具啓戰艦快鈍辛亥年京江造冬字
甲船中快下體鐵釘木釘相半上粧全用鐵釘共八鐵一千八百斤右
議政崔閔德曰可取今秋京江司水色造往字甲船上快下體鐵釘木
釘相半上粧專用鐵釘共八鐵一千九百斤一兩政府六曹皆曰可取
今春琉球國船匠造月字甲船下快上粧下體並用鐵釘共八鐵三千
三百五十二斤一兩 上乃命兵曹曰今後各道各浦戰艦以冬字往
字試驗船見樣造作琉球國船匠所造月字船雖上粧不合於戰艦然

其下體堅實可以取法亦并見據事行移各道○戊戌 上率王世子宗室
文武群臣幸東郊大閱軍士如儀宴世子及宗室宰臣于幄次分賜酒殽于
群臣及軍士○是日夜雷電驟雨○已亥視事 上曰野人到江邊乞食邊儲雖
少給之何如右議政崔閔德啓曰宜當給之閔德又啓曰平安道近因歉加以
兵革民產蕩盡馬匹軍裝恐不可嚴督 上曰此道罷弊極矣豈可比之他
道卿其量宜處之閔德對曰臣少長軍門常以國與民兩便爲心但恐法立
未敢擅便 上曰予既知之卿其勿疑閔德又啓曰以罪收職牒者多有可
用之材願覈輕重還給何如 上曰予已知之○庚子賜琉球國船匠三甫
羅米豆共十石仍令戶曹月給三甫羅及妻料○辛丑傳旨戶曹平安黃海
兩道人民不思覆壓之禍居於危險之地今年暴雨山崩多致壓死予甚
憫焉上項兩道及他道各官山崩可疑之地住居人民令所在守令毋或
刻期但以後日山崩覆壓之禍反覆開說漸次移居以免不測壓死之患○
壬寅 上率王世子講武于江原道平康等處議政府臺諫各一員及宗親駙
馬兵曹大小武臣扈從文武百僚祇送于興仁門外京畿監司許誠經歷
李宜洽楊州府使金宗興具朝服奉迎境上是日 上獵于楊州府綠楊
驛之原及檜巖南山次于楊州楓川之原京畿監司及忠清道監司南智

黃海道監司金孟誠獻方物○賜廩于六承旨○遣內侍別監致祭于紺
岳大灘之神○癸卯勸獵于健川之原縣監李君遇奉迎境上次于健川
縣松折院之原○傳旨兵曹今後講武時動駕日與還宮日外軍士皆佩大箭
駕前後雜人從橫出入司禁不能檢察有求職任且四衛軍士亦不整齊今
後嚴加檢察

世宗莊憲大王實錄卷第六十五

世宗莊憲大王實錄卷第六十六

冬十月甲辰朔平安道監司李叔時馳報使臣指揮孟控哥來百戶王
 欽舍人王武賚擊勅書率頭目三十名押被虜本國人四名九月二十
 七日渡鴨綠江即遣宣慰使雲城君朴從愚于平壤○獵于鐵原之原
 府使權曙奉迎道左○中左軍不應駕前三麾且兵不整齊獸多逃逸
 罪其管事鎮撫李升忠等令兵曹勅將帥李順蒙等○次于鐵原府馬
 山之原○遣注書李榮門薦禽于宗廟○江原道都事李畬來問安
 ○乙巳獵于鐵原平康之原江原道監司李士寬都事李畬平康縣監
 崔孝生等奉迎道左京畿監司許誠經歷李宜洽等辭○次于平康縣
 積山之原江原道都巡撫使朴坤來見監司李士寬進方物○中宮遣
 判內侍府事全心問安○初置仰釜日晷於惠政橋與宗廟前以測
 日影集賢殿直提學金墩為銘曰九所設施奠大時也夜有更漏晝難
 知也鑄銅為器形似釜也經設圓距子對午也窺隨物回點芥然也晝
 度於內半周天也圖畫紳身為愚氓也刻分昭昭透日明也置于路傍
 觀者聚也自今伊始民知作也○丙午獵于平康鐵原之原京畿監司
 許誠經歷李宜洽鐵原府使權曙等奉迎道左江原道監司李士寬都

事至禽辭賜衣各一領○議政府六曹遣叅贊成抑問安○丁未獵于
鐵原之平次于永平縣堀洞○命放江原黃海道侍衛牌仍教曰使臣
入京後又放京畿全羅慶尚道侍衛牌忠清道侍衛牌限來乙卯年正
月除番上○戊申以雨停獵○命京畿監司給鐵原安置倭人等米八
一石○京畿監司許誠啓今講武場獐鹿鮮少臣甚惶恐欲問其由於
所在官守令而罪之 上曰卿言然矣昔分水嶺講武顯有捕獸之跡
而終不得推今雖問之犯者難得然此大事固當鞠之誠以監司不能
預先措置乃至 宗廟之薦以獐代鹿禽獸鮮少之事播於人口畏其
譴責乃有是啓○上謂兵曹判書崔士康等曰今日雨下去留何以處
之士康啓曰雨則留宿已有立法且抱川每場院遙遠侍衛軍士輜重
恐或不及莫如留宿都承旨安崇善啓曰今日雖雨氣候稍溫每場院
不過二十五里儻雨不止明日亦留宿乎使臣入京日期已近今日須
次每場院明日還宮爲便 上從崇善之言次于每場院縣監郭保寧
奉迎道左○傳旨兵曹故僉知金陟嘗從予講武久矣今聞有子若有
可取才幹予欲用之試才以聞○己酉晝停于佛巖川邊京畿監司許
誠經歷李宜洽等辭賜衣各一領午時還宮群臣出迎于興仁門外○

庚戌遣宣慰使漢原君趙璿于開城府○禮曹啓各道節制使處置使遞換之際前使留營送印于境以迎新使當此之時脫有緩急應變文引不可無印自今營門交代親授印信以備不虞之變從之○令戶曹量減平安黃海兩道各官之貢各戶所糶待豐年收納因敬差官李師孟所啓也○每年是月初七日例賜百官襪蒲封倉戶曹啓廣興倉儲備殆盡一番頒賜亦借他司以給之今又借給國庫虛踈且年穀不稔請減封倉從之○全羅道宣慰別監卞孝文來復命進三峰島捕倭軍士功勞等第仍啓曰倭人所持無他兵器只有槍二柄而已其他皆釣魚之具也其非賊船明矣然三島非釣魚之處其捕之也亦宜矣但十名倭人只捕四人不生擒而皆斬之可疑且不審風水軍人十二名不知去處甚不可也姑除論賞更覈何如乃令議政府六曹議之僉曰釣魚倭船遠海窮追只捕倭人四名軍人十二名所騎之船終無去處所獲不償所失其鎮撫等釣魚倭船權辭以報處置使徐沆更不覈實以捕倭啓聞依律科罪並除論賞以沮後來邀功者從之○辛亥受常察視事○忠州判官梁湛辭引見曰予聞今年下道禾穀稍稔然年前凶歉民罹饑饉盡心賑恤

且饜饉之餘必煩獄訟慎刑恤民○都承旨安崇善啓曰前日大閱
只用京中侍衛軍六千餘人而稱大閱未便 上曰然古用幾人而
稱大閱乎令集賢殿考古制以啓崇善又啓曰今別侍衛之數六百
四十人也又加三百六十以一千爲額何如 上曰後日議于大臣
而定之 上曰中宮外戚安壽山安九經安以寧今皆已逝近戚無
仕官人可嘆也卿其錄近親可能從仕者以聞崇善啓九經之子好
文安守真之子質等可用 上曰後政叙用○初成吉道監司金宗
瑞報愁州住兀良哈千戶巨其大來說愁濱江住歎真弓狄哈未應
哈及其弟阿刺哈等今欲投化本國第因素與斡朵里等作讎究畏
此不得出歸若朝鮮遣通事以招則當率同類効誠歸順 上命議
政府諸曹同議以聞僉曰未應哈及阿刺哈等若到我境則厚待還
送爲可遣通事招安則不可其族類多少氣勢強弱和親與否今本
道備細聞見隨後更報若其答辭則當云若等離究在此遣通事召
來恐有不虞之變若等果欲歸順投我則當報國家慰撫從之○壬
子受常參○賜祭于卒判右軍都摠制府事致仕鄭以吾其教書曰耆
舊之臣既同休戚哀榮之典何間存亡是爲常規非我私惠惟卿稟

資質直操行勤儉學通經史才富詞華早登科第爲世名儒通和昭考
敷歷清班擢居翰墨之司又掌絳綸之命師長成均講論不急編摩史
館筆削得宜實斯文之宗匠而國家之貞彥也顧予當即位之初知卿
有老成之德乃崇資以致仕期養和以享年何不憇遺遽貽傷悼遣官
致奠用慰貞魂於戲齒德俱尊慨英賢之既逝思義已篤宜吊恤之特
加○召議政府六曹承文院提調議曰使臣率來頭目孫中密寫勅書
與遠接使李叔畝其勅書節該婆猪江人五十六名牛馬三百匹未盡
遣還其回奏之辭予以爲當其虜掠之際拒逆殺害幾名自溺幾名彼
士訟途病故幾名以上國軍丁解送幾名其餘拿來男婦共幾名已盡
遣還安有一口之不還者乎欲以此意回奏何如僉曰允當宜以此意
立草 從之又議曰禮曹啓今年松子不實謝恩禮物 帝所三百觔
東宮一百觔似難充數予以爲加入參以代之何如僉曰不可代以人
參須貿松子以充數可矣惟黃喜以爲專減松子不可 上從僉議又
議曰前日於經筵左承旨辛引孫啓曰臣爲慶尚道監司時已曾經驗
救荒之物莫若醬願令諸道行醬還上之法僉議以啓僉曰只合救荒
不宜常時黃喜曰臣曾於江原道監司時身親經驗救荒無如此物傳

旨戶曹醬還上之法切於救荒經驗後欲令各道並皆遵行姑今由歎
各官爲先行之又議曰予之朝夕御膳或有不精目前所見尚且如此
况文昭殿朝夕進膳予所不見乎予欲使宗親駙馬元尹以上每日一
人輪次入直檢察朝夕進膳殿內諸事何如僉曰上教至當即傳旨
惟曹宗親駙馬元尹以上每日一人輪次入直文昭殿檢察朝夕進
膳及殿內諸事又議曰各道都巡檢使河敬復等所啓犯罪三品以下
官吏直斷之事何以處之僉曰許令直斷惟時任守令萬戶千戶並皆
收贖軍士依前例鞭之從之又議曰別侍衛加數之初議者曰軍額
過多既不可且外方軍丁因此鮮少予強加之今觀別侍衛之勇不異
於內禁衛甲士予欲又加三百六十以充千數何如其加給逆兒熟議
以啓黃喜等以爲設一千用今冬來夏兩都自遷轉爲可從之令兵曹
立法上曰婆猪江人出來者必受酋長文憑然後方許上送已曾立
法然崔閏德以爲婆猪人涣散無統受酋長文憑者方許上送則威權
必集于一甚爲不可今年則姑從權宜勿論文憑有無皆許上送此議
何如崔士康等以爲如此則各驛甚困須有文憑許令上送黃喜等以
爲姑從時權令都安撫使擇可爲侍衛者勿論文憑有無上送從喜等

議又議曰昔權豆請欲以崔寶老例侍衛豆稱哈子甫同哈著金帶而
來亦請欲受帶此之職侍衛然二人皆受中朝指揮之職故其時議諸
廷臣未能除職侍衛今婆猪野人有欲來侍衛若指揮則聽從其請誠
爲不可其餘千戶百戶等類皆許上送何如崔士康等議有職者並皆
勿受黃喜等議有職者勿受如不得已依成吉道例待之申商等議指
揮外皆許其請崔閏德等議依成吉道例布置從閏德等議又議曰右
議政之往也若婆猪江人來謁則贈與米穀饋餉品秩何以爲之僉曰如
有不得已者來謁糧料饋餉並令閏德依邊將接待例或倍數或加
數或全數或減數臨時酌定從之○癸丑受常參○昌寧縣監姜友
德辭引見曰年前凶歉今年稍稔然饑饉之餘民必困窮往慎乃職以恤
民生○分遣都巡檢使吳陞于全羅道奉礪于慶尚道柳思訥于忠清
道金世敏于京畿左道及江原道盧龜祥于京畿右道及黃海道以察
軍容○遣領議政黃喜戶曹判書安純等于碧蹄迎慰使臣○平安道
都節制使報兵曹曰自壬子年以後江邊防禦以本道馬步兵元數分
爲二三番一年內再度赴防險遠之路非惟人馬俱困裹糧亦難今年
則以侍衛翼兵馬元數義州道十官於義州分三番赴防其餘各官馬

步兵以元數自十月至二月間延郡則分七番二十一日相遞慈城郡則分六番二十五日相遞江界理山碧潼昌城則分五番一朔相遞一度赴防事磨鍊分定今甲寅年當番第一番甲士九月十五日始間延慈城仍番赴防下番第二番第三番甲士十月十五日為始解水為限慈城以下各官分三番二朔相遞赴防事磨勘分定平壤寧邊義州三道船軍只留守船者其餘分四番一朔相遞今年十月十五日始明年二月十五日至江邊防禦最緊間延慈城江界等三處分定兵曹啓分番防禦令都安撫察理使同都節制使磨勘以啓又令監司劾都節制使不小兵馬擅自分番之罪從之○甲寅御勤政殿受朝○乙卯上率世子及群臣幸慕華館迎勅至景福宮行禮如常儀勅曰得奏忽刺溫野人地面虜去本國人口十四名稱無聞到花名不肯發還今原差指揮孟捏哥來等言除病故二名外其餘十二名見在茲復遣指揮孟捏哥來百戶王欽舍人王武等賚勅往諭肥河等五衛都指揮僉事刺令哈等令其著落忽刺溫地面野人沙隆哈等各名下追取送還本國如已送至王可收領給聚近又得建州毛憐衛都督撒萬答尖里等奏蒙差指揮孟捏哥來等 本國追還原獲去人口家財頭畜九月間

往本國建和城邊接取內不曾還者人五十六名馬牛三百匹及金銀段匹等件此言未知虛實如可未盡還王可與之挨追給還以副朕綏撫邊疆之意王宜體朕至懷禮畢 上升殿與使臣行私禮 上慰使臣曰因本國之事再行險路 上恩夫復何言王武曰此是 殿下敬事朝廷之致然也又曰自鴨綠江每館設盛饌累遣宰相賚內醢以慰感謝 上言於使臣曰前承勅諭野人馬財產已盡送還軍中戰死溺死路間病故及橫逆生變不得已殺戮外更無遺留今野人等虛張其數曰人口五十六牛馬三百匹未還矯飾奏達真偽在去年李滿住來文內牛馬未滿二十人口專不錄焉以此具奏爲意王武曰去年崔益兩使臣回還時旣曰野人牛馬盡數送回今夏未盡送回馬十匹人五口又以發還則猶恐人馬又有隱漏更推送還又曰聞江界李節制使與通事李和尚等去年冒達 殿下有隱匿之事萬一恐有如此之輩 殿下再三窮推 上曰去年使臣回還時人口之數預先計得無有隱誤牛馬家產勅到後始推故在遠未及計得馬十匹及已曾奏達完聚本國人五口因親夫哀乞今夏盡皆送還此外人馬家財無有隱漏但其時在遠馬匹未及送還深切兢惶幸天使忖度我心使臣曰欲與 殿下差遣

宰相及李滿住所遣人等一時復命李滿住使人來則使我等知會
上曰是行茶禮訖使臣歸大平館 上送至勤政門內文武群臣詣大
平館行禮 上幸大平館設下馬宴 上問使臣曰李滿住使人來到
江邊使之來京否使臣答曰來京則知會我等到江邊則 殿下任意
施行又曰我等回還時經過婆猪江野人等處越江諸事願預布置宴
罷三使臣送至中門曰以敬朝廷之意多備嘉饌誠心厚慰不勝感
謝孟王二使臣自以爲不知禮謙遜不言王武雖居末自以爲能允諸
問答先諸二人擅場對之○召議政府六曹承文院提調議曰今使臣
等曰俘虜野人內未盡送還人口牛馬雜物差人推刷費還予應之曰
年前欽奉勅書無遺刷還使臣曰 殿下何敢隱匿第邊將不無蔽匿
須更差人挨究送還予應之曰自我 祖宗以來四十餘年敬事朝廷
無一事差謬至此一事予豈誣罔 天聰乎使臣強言曰請更商量則
無乃以差人推刷為答乎僉曰 殿下深燭無遺何更差人推刷以起
前日之疑乎從之○上當宴行酒時王欽稱 殿下曰 皇帝上謂都
承旨安崇善曰欽稱予為皇帝至極驚恐為人甚輕薄不中者也卿其
知之令館伴亦知此意倘更發此言形不肯之色使勿復言之○禮曹

參議李孝仁管押種馬五十匹如京師○傳旨平安道監司賜被虜水
國女毛珍加等四口米入二石○兵曹啓咸吉道都節制使初則啓北
青以南當番甲士除番上慶源寧北會寧鎮分赴以實防禦今則啓都
節制使率領赴防前後各異似乎不可然都節制使以主將率領軍馬
數少有率大體都節制使及慶源寧北會寧等處各以附近磨勘分定
啓其分定之數 從之○議于政府曰高麗之時省五樞七而已至恭
愍王朝宰樞不過二十餘人今我本朝宰相之數至於四十餘人廷臣
之請減其額者非一 父王終不允許歲在癸卯水旱相仍民罹饑饉
調度甚繁議革冗官廷臣有曰宜減宰樞之數然予親承 父王之訓
不從其請只罷諸司不緊之員且各道監司都節制使處置使與經歷
依古制並帶兼官差遣祿俸之減幾至三千餘石至今行之而無弊第
今國家昇平日久累蒙上國之眷使介絡繹一宰樞至於再三赴京宰
樞之數不爲過多大抵儒者坐而論治故雖老尤切於用武臣奔走折
衝故膂力旣愆則無復用矣頃置六曹左右參判參議者所以閒用武
臣耳然武臣之優於吏事者蓋寡故不敢除授此官以滯下流如金孝
諤洪師錫等年前征討婆猪江俱以三品行其將帥之任此無他遷轉

洛陔故耳予欲各正監司都察制使處置使與經歷依古制下批差遣
且革六曹參判參議各一以置僉知中樞院事何如僉曰上教允當
又啓曰非特參判參議且如漢城府與三府府尹內不緊堂上並皆革
除加設僉知中樞院事二員可也○丙辰都承旨安崇善問安于使臣
張議政黃喜亦進問安○上率世子及群臣幸大平館設翼日宴王武
言爲來人口事何如只怕在下人等未盡推刷請 殿下宜當更令挨
刷畢還 上曰年前李滿住書內發還人口既已收領未還頭畜不過
二十今更虛張其數曰人口五十六馬牛三百予當以此意奏達大人
先知我意王武言 殿下年前孟崔賈來勅書看了今番勅書亦看了
我亦已知 殿下之心矣然我等受命而來故不敢不言 殿下勿以爲
怪奏本草我要見之○刑曹啓學生魯仁守殺人律該絞私奴於里
大殺人律該斬 從之○丁巳受常參視事 上曰今使臣到國之日聞其
言疑本國虜婆猪江人口頭匹未盡還送予對以無遺送回昨日乃
曰吾等爲此事來故言之若此耳若無遺送還 殿下雖欲刷付我等如
之何予聞其言固無強推之意且勅書云未知虛實則 天子本非實
聽野人之言也明矣使臣何強推之有許稠對曰臣意亦以爲然○左

承旨辛引孫問安于使臣王武曰昨日 殿下曰修奏本草以示須送

其草且野人未還人口財產抄錄之文予乃賚來照得施行可也仍授
引孫引孫曰殿下之意大人已知之矣豈敢絲毫隱匿王武曰中朝視
朝鮮如一家不以外國待之吾等入野人地面不無困苦今到貴國絲
無憂慮且曰吾等欲與貴國使臣及野人等一時回奏○三使臣遣頭
目孫中李旺金貴等進綵段及雜物于 三殿引見于思啟殿命饋送

○以奉礪尹璠爲戶曹左右叅判許誠禮曹右叅判朴安臣刑曹右叅
判成槩工曹右叅判○司僕寺啓江華府信島入放黑五明雌雄馬及
烏嘴烏眼烏腎烏蹄潔白雌雄馬其數尠少孳息不多兩色馬匹揀出
於各道牧場又令慶尚全羅道雌雄并各十五匹忠清京畿平安咸吉
道各十匹黃海江原道各五匹推覓上送放於京畿南音島 從之但

令平安道勿進○平安道都節制使報兵曹曰每當使臣出來之時朔
州節制使率領軍馬到義州迎護送軍人禁亂已有前例然當使臣出
來之時道掌各官价川則安興館雲山則新安館泰川則林伴館昌城
碧潼則義順館刷其人馬出來支應朔州則人馬送于林伴支應設於
博川因此各官人物無餘且自各官至義州价川則五日程雲山則四

日程秦川碧潼則三日程朔州昌城則兩日程使臣出來無時雖欲及期馳赴道路遙隔人馬俱困或有不及徒弊於民而已况朔州昌城碧潼邊警緊急之地因支應禁亂虛其防禦空邑而出甚不可也義州則所屬十官軍士冬節分三番夏節分六番赴防軍官頗多除送朔州道軍馬令義州禁亂以除民弊兵曹啓令本道監司磨勘啓聞後更議施行從之○戊午遣都承旨安崇善通事僉知中樞金乙亥各贈毛衣毛冠毛護膝靴套及衣一襲于三使臣又各賜衣一領靴套于頭目三十人○慶昌府尹田興同知中樞院事權聃以賀正奉表箋如京師上率百官拜表箋如儀儀進海青二連○差通事辛伯溫官押被虜唐人李整等一十名解送遼東○兵曹據濟州安撫使呈啓請給濟州旌義大靜等官防禦所用玄字鐵翎皮翎箭黃字鎮翎皮翎箭金鏃走火等物從之○兵曹據忠清道處置使羅啓各浦萬戶千戶常在本處防禦如有賊變往助戰所已有成法然猝生賊變必不及期兵法曰無恃其不來恃吾有所待六典載常在船上軍器火藥無時修鍊今後左道都萬戶則助戰所安興梁波知島萬戶則助戰所都苞串高寧萬戶則助戰所蛇浦常在船上預備防禦其助戰所常不泊立舒川浦大津唐

津浦萬戶千戶待其賊變下海助戰使之防禦得中 從之○己未以
月食停朝○左副承旨尹炯問安于使臣王武曰未還野人物件 殿
下已知之矣年前崔真等八月出來十二月回還推刷既至然人口馬
匹尚有脫遺今者李滿住及撒滿答失里等人口五十六牛馬共三百
猶未發還是雖虛張其數然十分之內豈無一分可實者乎須臾揆究
得一物以付吾等則其於回奏河難炯曰 殿下向朝廷雖細事尚且
謹慎况欵奉勅諭何敢隱匿年前征討時戰亡及自焚自溺未知其數
本國境內絕無脫遺使臣曰有無間須啓達炯辭使臣曰吾等欲與謝
恩使及建州人等一時回奏以終是事炯曰非自一處發程馬能一時
赴京奏達使臣曰謝恩使歸在遼東吾等入婆猪江地面率野人會于
遼東則猶可一時回奏又曰前日 殿下曰修奏本章以示何不來示
炯曰 殿下令攸司草之未就畢則當來示矣使臣曰戰亡自溺數及
到國境物故之數具載來兩王令通事金汗追告於庭中曰吾等特蒙
恩賜禮當往謝第恐 殿下勞動未果耳此意須啓達○鴝鵒鳴于內
城東北隅行解恠祭○庚申受常祭○右副承旨李堅基問安于三使
臣孟曰患咳嗽 殿下賜藥今已少愈又曰吳指揮去七月教遼東往

毛憐等衛回還時必道經朝鮮願將此意啓 殿下吳指揮若出來則
毋防即通於我等○王世子往大平館設宴慰使臣○辛酉受常參○
同副承旨柳守剛問安于三使臣孟曰近日發還人五口馬十匹將何
以奏達請布置得宜○遣宦官韓龍鳳分贈別膳于三使臣○平安道
都安撫察理使崔閔德辭引見于思政殿仍賜毛衣命都承旨安崇善
往餞于洪濟院○賜祭于卒判中樞院事安壽山其教書曰死生有命難
逃理數之常恩義兼隆盍舉哀榮之典惟卿天資溫厚器量寬弘廉
靜無華謙恭有守以名門之華冒爲戚里之表儀歷任清華宣勞中外
贊禮閣門而周旋中節司刑秋部而決訟無冤近年以來俾處閑官庶
幾怡養永膺壽考共享安榮及聞失和遣醫調治庶資藥餌之效以復
元氣之和何計音之遽聞使予心而傷悼即令輟朝而致賻賜諡以易
名且命禮官俾陳薄奠於戡姻親已逝慨舊德之難忘恤典斯加慰英
靈之不昧○壬戌受常參視事○右承旨鄭申孫問安于三使臣使臣
曰今後晝奉杯越三日乃設○癸亥遣宦官韓龍鳳分贈食物于三使
臣○命都承旨安崇善往議政府議事一昨日令崇善賚奏本草往示
于使臣王武曰此奏本伊誰賚進乎崇善曰謝恩使賚進又曰何時裝

程乎答曰二十一日發程武曰不可貴國及毛憐建州等衛人與吾等各
行奏達言辭不一則非唯吾等受責當有使臣更來今謝恩使須與吾等
偕行庶便答曰前此當本國慶事到國十日內遣使謝恩常例也烏可遷
延武曰此謝恩非常例也須與吾等偕行庶無後弊頭目孫中在傍猝
然曰吾與王天使欽在京時楊學士禮部尚書等曰爾等出去與朝鮮
使臣及野人等一同回奏對正庶無後患崇善曰曾降 聖旨口傳聖
旨勿聽况楊學士禮部尚書一時之言乎又告王武曰大人之心以謂
謝恩使何時發程乎武答曰吾等一時偕行可也發程日時則彌縫
不言崇善曰朝廷於凡事靡不照顧前例本國遣使謝恩不過十日已
有成規 殿下安敢私自進退乎使臣不聽今日請宴必更發此言將
何以答之僉曰今使臣出來無一物刷得謝恩使強請延行近似初則
沮之強請不已則答云可延五六月以觀去留之勢何如一崇善啓曰
海青乃進 獻之物義所當捕然本國之人初未知捕捉之術故國家重
賞以勸今捕捉之術民皆知曉海青捕捉易於前昔國家重賞無有增
減無乃官守濫而糜費不貲乎况平安咸吉道防禦最緊宜當儲備糧
餉以備不虞今海青捕捉專在兩道捕捉之人皆給米穀則不幾年間

糜費之數幾至數千餘石糧餉將竭不可不慮自今若捕玉海青者米
五十石緜布則五十匹自願受職則土官七品因官令捕捉者米則
三十石緜布則三十匹自願受職則土官正八品捕得雜海青者米則
二十五石緜布則二十五匹自願受職者土官正八品以官令捕捉者
米則十五石緜布則十五匹自願受職者土官從八品以此差等論賞
則官爵不濫糜費減省矣此議何如僉曰允當 上從之令兵曹立法
一右議政崔閔德啓曰野人等慕義而來國家願以厚意安於所館使
不他適彼人反謂無異拘繫不無快恨自今彼人如欲遊觀許令監護
官率領遊觀又欲見所知之人亦令接見此議何如僉曰可也一閔德
又啓曰年前征討時軍士等被堅執銳風餐露宿辛苦不淺成功者悉
令除授以慰其勞雖不成功辛苦跋涉者除職以慰其心可也崇善啓
曰考其成功然後論賞載在六典不宜施行此兩議何如僉曰若從閔
德之言則人人蜂起爭欲受賞將不勝其除授宜從崇善之言依古賞
有功 上皆從之○命安崇善僉知中樞院事金乙亥等請三使臣設溫
斟宴于勤政殿當宴命崇善往議政府議曰謝恩使本月二十一日發
程使臣勢將不聽若強諍防遮則似乎促客其於主人待客之意何如

使臣啟程後發遣手使臣啟程前先送使之徐行每站止宿以待使臣
婆猪江往還一行乎僉曰奏本填寫日時與勅諭到國日時相遠則朝
廷必照考前例以爲稽緩以此意開說當月晦時發遣似乎便益上
從之謝恩使起程以本月二十七日爲定宴訖上送使臣于勤政門
內孟辭出時出懷中書以進乃求石燈籠也○甲子御勤政殿受朝○都
承旨安崇善問安于三使臣孟曰吾等貿易貴國禁細布只令麤
布買賣今後勿論麤細許令買賣崇善答曰殿下已令依司從自願
買賣何禁之有王武曰前日啟野人到境須告吾輩崇善答曰來則必
告武曰野人出來使吾輩得見何必往彼土乎且曰自江界至婆猪江
五日餘程也自江界至義州幾日程乎崇善答曰因退方未曾的知使
臣曰待吾輩往彼土回還江界後遣使謝恩何如崇善答曰勅諭到國
遣使謝恩不過十日已爲成例厥今遲延義所不當然殿下強從大
人之請延七日朝廷靡事不考前例今過十日填日殿下恐未安
然何敢有違大人之請○乙丑受常然視事○傳旨禮曹前此野人等
來京以厚待之意安於館舍然野人意謂不得出入無異拘繫反生快
恨今後若欲遊觀則監護官率領遊觀欲見所知人則隨即啟達使之

相見○傳旨兵曹黃海道待衛澤來十一月始勿令番上○命收江界
府使池有容贖牒放于遠方以逃來野人張交河等四名虛踈防禁逃
還本土故也○丙寅受常參○諸宗親往大平館設宴慰使臣○禮曹
啓春秋講武及累日經宿行幸還宮後隨駕宗親以下東西各品問安
後罷去違者令兵曹司憲府糾理從之○召議政府六曹議事一今
朝左副承旨尹炯問安于使臣王武曰曩者還本帖兒漢女等五名及
馬十匹聞吾等陪勅書出來而刷還也炯曰勅書先聲未到前刷還也
武曰何時送還乎炯曰五六月也武曰通事艾儉知吾等出來四月到
本國人口馬匹七月入送豈勅諭先聲未到前乎炯曰推刷則已前事
也使臣以爲本國聞勅諭出來然後刷還也上項人口馬匹入送日時
及所答之辭同議以啓僉曰宜答以帖兒漢發還今三月二十日下教
禮曹艾僉至五月十七日回自北京則帖兒漢等雖送于七月其發還
之言勅諭先聲未到前已定使臣若不信則今往婆猪江親問其女則
可知其實以此答之幸甚從之一使臣等今欲道經于剌山入毛憐
建州等衛請指路人從之乎領議政黃喜等議不可給送禮曹判書申
商等議給送可也安崇善啓曰年前崔真請率土本國一人于忽刺温

以無 聖旨而境外使人於義不可不從今若從之則與前言有異不可聽
從也從喜等議一今修謝恩使賫去事目其一曰中朝管事人等倘問
續刷野人馬匹如何不即還送至今年乃還乎將應之曰年前刷還時
邊遠居民收留馬匹未及裝還 殿下深切兢惶聞至今年乃刷已令
邊將授於出來野人而送之其江界出來野人等曰非吾馬也不肯受
去殿後野人等來于國都又欲囑送彼人等亦曰非吾馬也將恐中途
逃逸又不受去緣此留養江界至夏本主出來受去其二曰本國女帖
兒漢及所生女五口年前其夫到江邊請還時如何不即授送至今年
乃還乎將應之曰元係本國已經奏達給親完聚然 殿下聞其夫到
江邊悲呼請還深自哀憫即送江界以待彼人帶回然無來受者因留
江界至夏乃還此事目如何僉曰允當從之○丁卯受常參○命都承
旨安崇善僉知中樞院事金乙亥問安于三使臣回贈孟捏哥來麻布
二十四匹 中宮麻布十五匹別贈石燈盞二事彩花席四張人參二
十觔孟向北行扣頭四拜曰圖報無由但祝 聖壽耳王欽麻布三十
二匹 中宮麻布十四匹別贈石燈盞二事彩花席四張人參二十觔
欽感受曰 殿下息賜頂戴不起王武麻布三十五匹 中宮麻布十

三匹別贈石燈盞二事彩花席四張人參二十勛武亦感受崇善仍與
三使臣言帖兒漢及馬勒論先聲未到前發還使臣猶未信也崇善曰
大人雖未信 皇帝明見萬里必燭之矣且大人何獨信野人之言而
不信我 殿下之言乎王武答曰吾等受朝廷之命不得不爾○左輔
德崔萬理賚東宮回奉麻布贈孟捏哥來十五匹王欽二十匹王武八
匹○兵曹啓經制續兵典吹角令義禁府司僕寺軍器監率吏典及工
匠各守本司待命然軍器監景福宮昌德宮紫門及本監皆有軍器分
司堅守待命從之○成吉道監司啓承傳旨寧北府會寧鎮永永相換
便否會寧鎮雖作府居民所耕之地足不足防禦可當否臣與都節制
使成達生都巡撫使沈道源寧北鎮節制使李澄玉同議道源澄玉議
曰會寧第一要害防禦最緊雖城底土田不多并計附近可耕之地則
非不足也稱爲會寧都護府差節制使判官寧北府還稱寧北鎮差節
制使其供頓衙前使令仍令會寧府支持達生議曰會寧寧北相換
當依上項施行唯僉節制使無土地人民未便會寧府土地附近三百
戶割屬別立郡縣兼差僉節制使臣意以謂會寧寧北相換與成達生
等議相合然寧北鎮割屬土地別置郡縣則鄉吏官奴婢及諸事出處

爲難且新設府邑勢分力弱姑除割屬土地只令分屬魚梁待其新徙
人民阜盛疆場完固然後更議施行僉節制使支待諸事姑從已行之
例施行何如從之○戊辰受常參視事領議政黃喜啓中外罪人推考
時以鄉言俚語取招其辭專未知會雖有可知之處年久則不知令刑
曹立法禁斷何如從之○都承旨安崇善啓禮曹判書申商與臣言曰
京畿鐵原府講武最宜之處繇役倍多移屬江原道以忠清道竹山縣
移屬京畿何如 上曰令兵曹立法○賜狐裘各一于六承旨○遣宦
官韓龍鳳分贈柚子于三使臣○己巳御勤政殿受朝○吏曹啓各道
監司都節制使首領官等依古制並帶京官差遣若以六曹堂上郎廳
差遣則或移差閑官有違京官久任之意自今觀察使節制使處置使
首領官依前下批差遣祿俸則從實職減一等頒賜革六曹參判參議
各一移屬參議四于中樞院爲僉知何如從之○司憲府以除授不當
劾請吏曹官吏之罪命皆原之初成均學諭朴越提學尹淮之族也淮
諷翰院薦爲史官國制新除史官者翰院僉議考其才行門望一舉三
人吏曹叙其首舉棄其餘越爲第二故不叙後淮又囑吏曹錄前狀除
授憲司以違格劾之○議政府六曹往大平館設宴慰使臣○謝恩使

申察洪理等往大平館以明日發行辭使臣等曰明日起程則是
下促我等也申察等將此意以啓 上怒即命都承旨安崇善往告使
臣曰自我 祖宗以來四十餘年恭事朝廷慶事到國則不踰十日遣
使謝恩明有前例今使臣本月十二日到國二十一日遣使謝恩例也
予強從使臣之請不得已遷延退定二十七日使臣何發促行之言乎
若使促行則以前定二十一日發程何敢退定乎發程後行之緩急專在
使臣之意使臣等曰二十七日發程徐行以待我等一時越江幸甚○
庚午謝恩使吏曹判書申察副使同知中樞院事洪理等齊擊表箋及
卞明奏本如京師 上率世子以下文武百僚拜表箋如儀其表曰欽
差指揮孟捏哥來等齎奉勅諭到國給還忽刺溫野人虜去婦女四口
臣與一國臣民不勝感激謹奉表稱謝者文德詵敷懷柔旣極睿謨諄
切眷顧彌隆銘骨何忘矢心圖報仗念臣幸逢昭代叨守弊封曾無尺
寸之功特荷乾坤之造頃值鄰寇之標竊覆蒙 上聖之哀矜使節聯
翩庸示撫綏之意旃裘驚服乃還俘虜之氓茲再生之至恩諒前昔之
所罕歡騰里巷喜溢臣工茲蓋伏遇 皇帝陛下度擴兼容仁深覆育
保萬民如赤子合四海爲一家遂令小邦獲承殊渥臣謹當之屏之翰

益虔執壤之儀曰壽曰康恒祝齊天之筭其方物表曰天眷悉深俾遠
俘虜土宜雖薄聊表忱誠謹備黃白細苧布各二十匹黑細麻布五十
匹滿花黃花雜彩花席各一十張人參一百觔松子二百觔雜色馬十
六匹右件物等產自荒陬製非良匠冀諒申中之信俯容享上之儀
太后進獻禮物紅白細苧布各一十匹黑細麻布三十匹 中宮進獻
禮物與 皇太后禮物同 皇太子進獻禮物白細苧布一十匹黑細
麻布三十匹人參五十觔松子一百觔雜色馬四匹其奏本曰欽差指
揮孟捏哥來等到國欽蒙勅諭節該近又得建州毛憐衛都督撒滿咨
失里等奏蒙差指揮孟捏哥來等至本國追還原獲去人口家財豕畜
九月間往本國建和城邊接取內不曾還者人五十六口馬牛三百匹
及金銀段匹等件此言未知虛實如果未盡還王可與之挨追給還以
副朕綏撫邊疆之意欽此臣查照得先於宣德八年四月間邊將於婆
猜地面捕賊時或殺死或自焚溺死不記其數外生擒二百二十六名
內凶途病故四名中路逃脫被殺一十九名到本國節次患病身故二
十一名都督猛哥帖木兒差人告取姻戚二名軍中攻伐事因還送報
說人二名曾被本處野人虜掠遼東軍丁二十二名病故人二名本國

婦女帖兒漢在先被虜與野人奸生兒女并五口除將上項遼東軍丁
發還原籍已經奏達至本年閏八月初十日欽蒙勅諭節該王亦須以
所得建州等衛人口頭畜等物還之而自今謹固邊備輯和隣境欽此
除欽遵外即令該司挨刷所獲人口內上項本國婦女所生并六口亦
已奏達寄留其餘一百四十八名到本國新產小兒三名牛馬元數二百一
十三匹內除倒死五十八匹外實在一百五十五匹軍人拾得銀帶一
腰瓶盞等一十事奇零不記數家財等物差人押送一一交割去後續
刷出邊遠居民收留馬一十匹臣以未及奏達深切兢惶上項婦女帖
兒漢等雖係本國人口其夫主野人來到江邊悲呼帶回臣仰體勅諭
事意前項人口馬匹並令發回有掌毛憐衛都督李撒滿答失里掌建
州衛事李滿住等報到文書內該指揮孟捏哥來百戶崔真等賚勅往
諭朝鮮國王人口家財頭畜等物還給今已各寨交還差親第三保奴
等五員名致謝未曾得誥命勅諭及軍器衣甲家財馬十七匹牛八頭
今欽見奉數內未還人五十六口馬牛三百匹金銀段匹等件挨進給
還臣思忖得所據人口必是將中路逃脫被殺病故及已解遼東軍丁
等項人口稱爲未還又有金銀段匹先次民間裁用零碎片帛盡刷送

回其馬牛三百匹撒滿荅失里等報到本國文書並無人口數目只有馬牛并二十五匹與奏達數目不同又燕本處野人等連續往來本國亦無告索人口今來却將虛數奏達臣深蒙 聖恩日夜圖報猶恐未効况今再降勅諭 天意諄切臣安敢將些少野人俘虜與其馬牛財產占悅不義理宜辨明為此謹具奏聞并進年魚子鮓一十五壘緊當拜辭啓曰判義州牧事李思儉年老武才已衰不宜邊戍之任 上曰後當遞差又啓曰會寧僉節制使何漢成禦邊遠不得率眷赴任但以時無土地人民之故戶曹不給依例廩祿 上曰令戶曹磨勘給之○左承旨辛引孫問安于三使臣王武曰年前崔孟兩使臣刷還野人物件朝廷以為未盡刷還仍囚之今者奏本則以大槩施行可也吾所受書有曰竒零不記數若不悉計其數則朝廷必責之請備書雜物之數以付於我引孫荅曰 殿下已令攸司磨勘使臣曰吾輩欲歸入于婆猪江地面經由何道乎引孫荅曰大人欲經由江界則由江界經由他途則由他途在大人任意耳使臣曰吾聞江界等處道途險阻野人等移住于刺山地面由何道入歸乎引孫荅曰野人出來則必知居處與經過道路矣使臣曰野人出來使吾輩得見乎引孫荅曰不來則已矣來

則必使大人見之矣兩王曰頭目賚來雜物思欲買賣貴國禁細布茲
用未得速買吾輩前日登南山俯瞰國都人居稠密每十戶買段子二
匹猶且有餘今後勿禁細布皮物許令貿易引孫荅曰男婦各賚所有
之物任意貿易何禁之有○兵曹啓革三軍衙門而中軍所屬內禁忠
義別侍衛司禁不議移屬之處上項各衛之事各其節制使直呈本曹
本曹亦直行文書且攝隊長隊副補充軍分屬十司其於及期差定之
祭衙前鮮少各衛上大護軍各因他務仕進不齊且托故相推反有稽
緩脫漏之弊三軍之官並皆革除則五負込仗無統屬之處但革知事
僉知只存護軍仍使統攝五負込仗兼領攝六十補充軍差發之任會
仕一處勿論披我軍專掌施行定給書負使令聽令於本曹則庶幾無
稽緩脫漏之弊矣且行上護軍監巡之日不可以無奴婢本衛支持並
令中樞院首領官總管令六房錄事專掌施行下詳定所議之黃喜議
曰臣謹按經濟元典一款節該將兵者位卑則從順上命安守其分不
敢生亂今朝廷將兵者百戶前朝將兵者將軍也本朝府兵之制已有
此意使將軍將五負十將六十其大將軍以上無與焉然則自前朝至
于本朝使將軍率司直副司直司正副司正及隊長隊副體統不亂上